


土岐文庫
文庫17
W 82
21



文庫 17
W82
21

序

古來詩人富於詩者莫如渭南或謂其語多重沓虛
貌景不能遠攬窮搜而僅工於體物是將以淺淺之識
沒作述之苦心耶夫樂無定聲而務和其節繪無定狀
而期肖其形渭南之詩惟其意之自得耳其志夸宕故
于節也和其思刻苦故于形也肖當其細入毫芒幽窮
影響固隱如風雨之集而莫測其端而隊仗鮮明冠服
偉麗時又何嘗不如西山校射獵騎千羣別館張筵從
官百輩乎且獨不見夫惓惓憂國之詩耶自夫神京陸
沉偷安南渡渭南以一書生蒿目當塗彎弧躍馬之思



昭和六十年二月一日贈
土岐善吉磨氏寄

010185188472

既老不釋觀于家祭無忘之語千秋而下亦為長慟比其用心與子美何以異詩云爾哉若其詩之前後錯出譬之深山大澤包含者多不暇剪除蕩滌豈如守半畝之官一木一石可屈指計數而顧欲以此傲彼乎舉今世皆俎豆陸詩余何庸辨而芟多即寡差謂與作者之意不大謬云

雪蒼氏題



劔南詩鈔

五五

陸游字務觀越州山陰人十二能詩文蔡補登仕郎鎮廳薦送第一秦檜孫墳居次檜不說歷年試禮部復置游前列檜顯黜之繇是為所嫉檜死始赴寧德簿以薦除敕令所刪定官孝宗初遷樞密院編脩編類聖政所檢討官召見賜進士出身尋免去五為州別駕西泝夔道范成大帥蜀為參議官以文字交不拘體法人譏其放因自號放翁後累遷與祠起知嚴州再召見曰卿筆力回斡非他人可及同脩三朝國史實錄陞寶章閣待制致仕封渭南伯卒年八十五詩彙最多以居蜀久不能忘統署其彙曰劔南以是志孝宗嘗問周必大曰今詩人亦有如唐李白者乎必大以對對人因呼為小太



白劉後村謂近歲詩人雜博者堆家數空疎者窘材
出奇者費摻索縛律者少變化惟放翁記問足以貫通
力量足以驅使才思足以發越氣魄足以陵暴南渡而
下故當爲一大宗吾謂豈惟南渡雖全宋不多得也宋
詩大半從少陵分支故山谷云天下幾人學杜甫誰得
其皮與其骨若放翁者不享皮骨盡得其心矣所謂愛
君憂國之誠見乎辭者每飯不忘故其詩浩瀚率律自
有神合嗚呼此其所以爲大宗也與

寄酬會學士學宛陵先生體比得書云所寓廣教僧
舍有陸子泉每對之輒奉懷

庭中下午鵲門外傳遠書小印紅屋蜂兩端與蠟塗開紙
展矮紙滑細疑卵膚首言勞良苦後問遠妻孥中間勉以

仕語意極勤渠字如老瘠竹墨淡行疎疎詩如古鼎篆可
愛不可摹快讀醒人意垢癢逢肥梳細讀味益長炙較出
膏腴行吟坐卧看廢食至日晡想見落筆時萬象聽指呼
亦知題詩處綠井石髮麤公開討有客煎茶置風爐倘公
無客時濯纓亦足娛井名本季疵思人理豈無居然及賤
子媿謝恩意殊幾時得從公舊學鋤荒蕪古文講聲形誤
字辨魯魚時時酌井泉露芽奉瓊盃不知公許否因風報
何如

新夏感事

百花過盡綠陰成漠漠爐香睡晚晴病起兼旬疎把酒山
溪四月始聞鶯近傳下詔通言路已小餘生見太平聖主
不忘初政美小儒唯有涕縱橫

寄陳魯山

蘇詩調宮下

天下無虞國論說書生端合老山林平生力學所得處政
要如今不動心舊友幾年猶短榻請官萬里少來音願公
思此寬羈旅靜勝炎曦豈易侵

出縣

昏昏薄領不堪論出宿聊寬久客魂稻龍牛行泥活活墊
塘橋壞雨昏昏權籬護藥纜通徑竹篔分泉自遍村歸計
未成畱亦好愁腸不用遠吳門

東陽道中

展敬烏帽送輕寒雨點春衫作碎斑小吏知人當著句先
安筆硯對溪山

東陽觀醮醮

福州正月把離杯已見醮醮壓架開吳地春寒花漸晚北
歸一路摘香來

送杜起莘殿院出守遂寧

羽檄聯翩晝夜馳臣憂顧不在邊陲軍容地密寧當議陸
下恩深不忍欺白簡萬言幾勸哭青編一傳可前知平生
所學今無負未歎還鄉兩鬢絲

聞武均州報已復西京

作千年計天

白髮將軍亦壯哉西京昨夜捷書來
意寧知一日回列聖仁恩滋雨露中興赦令疾風雷懸知
寒食朝陵使驛路梨花處處開

喜小兒輩到行在

阿綱學書蚓滿幅阿繪學語鸞
嚼木截竹作馬走不休小

車駕羊聲陸續書窗凝壁誰忍
嗔號呼也復可憐人却思
馬飲江水敢道春風無戰塵
傳聞賊棄兩京走列城爭
爲朝廷守從今父子見太平
花前飲水勿飲酒

送七兄赴揚州帥幕

初報邊烽照石頭旋聞
馬集瓜州諸公誰聽芻蕘策
吾輩空懷吹畝憂急雪打窗心
共碎危樓望遠涕俱流豈知
今日淮南路亂絮飛花送客舟

村居

富貴功名不擬論且浮舴艋寄
煙村生憎快馬隨鞭影寧
作癡人記劒痕樵牧相諳欲爭
席比鄰漸熟約論婚長春
夜績吾家舊正要遺風付子孫

盆池

門外江濤湧雪堆埋盆作沼亦
何哉兒曹不解渠翁意新
脫風波嶮處來

次韻无咎別後見寄

平日孟行不解辭長亭况是送
君時幾行零落僧窗字何
限流傳樂府詩歸思恰如重醞
酒歡情略似欲殘棊龍蛇
飛動無由見坐媿文園屬思遲

詩來五月乃能和會故云

望江道中

吾道非邪來曠野江濤始此去
何之起隨鳥鵲初翻後宿
及牛羊欲下時風力漸添帆力
健鶻聲常雜雁聲悲晚來
又入淮南路紅樹青山合有詩

去年余佐京口遇王嘉叟從張魏公督師過焉魏公道免相嘉叟亦出守莆陽近辱書報魏公已葬衡

山感歎不已因用所遺杜頰亭詩韻奉寄

河亭挈手共徘徊萬事寧非有
數莖菁閣相君三黜去青
雲萬事一麾來中原故老知誰
在南嶽新丘共此哀火冷
夜窗聽急雪相思時取近書開

自詠示客

衰髮蕭蕭老郡丞
洪州又看上元燈
羞將枉直分尋尺寧
走東西就斗升吏進飽
語箝紙尾客來苦勸摸
牀稜歸裝漸理君知否
笑指廬山古澗藤

廬山僧近寄藤杖甚奇

上巳臨川道中

二月六夜春水生陸子初有臨川行
溪澗橋斷不得渡城
近卧聞吹角聲三月三日天氣新
臨川道中愁殺人織織
女手桑葉綠漠漠客舍桐花春
半生怕路如怕虎幽居不

省遊城府鶴軀苦瘦坐長饑
龜息無聲惟默數如今自憐
還自笑斂版低心事年少儒冠
未恨終自誤刀筆最驚非
素料五更欹枕一倏然夢裏扁
舟水接天紅蓼綠芰梅山下
白塢朱樓禹廟邊

初夏道中

桑間甚熟麥齊腰
鶯語惺惺野雉驕
日薄人家晒蚕子雨
餘山客買魚苗
豐年隨處俱堪樂
行路終然不自聊
獨喜此身強健在
又搖團扇著絺蕉

上虞逆旅見舊題歲月感懷

舡艫爲家東復西
今朝破曉下前溪
青山缺處日初上
孤店開時鶯亂啼
倦枕不成千里夢
壞牆閒覓十年題
漆園傲吏猶非遠
物我區區豈足齊

夜聞松聲有感

清晨放船落星石大風吹颿如箭激回頭已失廬山雲却
上吳城觀落日夜深龍歸擘祠門入木數寸雷爪痕明朝
就視心尚慄腥風卷地雷霆奔歸船買酒特自慰性命平
生驚屢戲固知神怒有定時波紋蹙作魚鱗細如今衰病
卧林垆霜覆茆簷月滿庭松聲驚破三更夢猶作當時風
浪聽丙戌十月自京口移官豫章冒風濤自星子解舟半
日至吳城山小龍廟

送芮國器司業

往歲淮邊未歸諸生合疏論危機人材衰靡方當慮士
氣崢嶸未可非萬事不如公論久諸賢莫與衆心違還朝
此段宜先及豈獨遺經賴發揮

晚泊

半世無歸似轉蓬今年作夢到巴東身遊萬死一生地路
入千峰百嶂中鄰舫有時來乞火鼓祠無處不祈風晚潮
又泊淮南岸落日啼鴉戍堞空

雨中泊趙屯有感

歸燕羈鴻共斷魂荻花楓葉泊孤村風吹暗浪重添纜雨
送新寒半掩門魚市人煙橫慘淡龍祠簫鼓鬧黃昏此身
且健無餘恨行路雖難莫更論

黃州

局促常悲類楚囚遷流還歎學齊優江聲不盡英雄恨天
意無私草木秋萬里羈愁添白髮一帆寒日過黃州君看
赤壁終陳跡生子何須似仲謀

石首縣雨中繫舟戲作短歌

庚寅去吳西適楚秋晚孤舟泊江渚荒林月黑虎欲行古
道人稀鬼相語鬼語亦如人語悲楚國繁華非昔時章華
臺前小家住茆屋雨漏秋風吹悲哉秦人真虎狼欺侮六
國囚侯王亦知廢興古來有但恨不見秦先亡開窗酌汝
一盃酒等爲亡國秦更醜驪山豕破已千年至今過者無
傷憐

初寒

船尾寒風不滿旗江邊鼓祠常揜扉行人畏虎少晨起舟
子捕魚多夜歸茆葉翻翻帶宿雨葦花漠漠弄斜暉傷心
到處聞碓杵九月今年未授衣

水亭有懷

漁村把酒對丹楓水驛憑軒送去鴻道路半年行不到江

山萬里看無窮故人草詔九天上老子題詩三峽中笑謂
毛錐可無恨書生處處與卿同

將離江陵

算算過渡頭旦旦走隄上舟人與關吏見熟識顏狀瘦頽
久不去常恐遭誚讓昨日倒檣干今日聯百丈買薪備雨
雪儲米滿瓶益明當遂去此障袂先側望卽今孟冬月波
濤幸非壯潦收出奇石霧卷見疊嶂地嶮多崎嶇峽束少
平曠從來樂山水臨老愈跌宕皇天憐其狂擇地令自放
山花白似雪江水綠於釀竹枝本楚些妙句寄懷愴何當
出清詩千古續遺唱

滄灘

百夫正謹助鳴鱗舟中對面不得語須臾人散寂無譁惟

開百丈轉兩車嘔嘔啞啞車轉急舟人已在沙際立霧斂
蘆村落照紅雨餘漁舍炊煙溼故鄉回首已千山上峽初
經第一灘少年亦慕宦遊樂投老方知行路難

黃牛峽廟

三峽東江流崖谷互吐納黃牛不負重雲表恣蹴蹋吳船
與蜀舸有請神必會誰憐馬遭刑百歲創未合柁師浪犇
走烹飪陳酒榼紛然餽神餘羹肉爭喂嚙空庭多落葉日
暮聲颯颯奇文粲可辨高古篆籀雜村女賣秋茶簪花髻
鬢匝襖兒著背上帖妥若在榻山寒雪欲下虎出門早闔
我行忽至此臨風久嗚咽

巴東令廨白雲亭

寇公壯歲落巴蠻得意孤亭縹緲間常倚曲闌貪看水不
安四壁怕遮山遺民雖盡猶能說老令初來亦愛閒正使
官清貧至骨未妨畱客聽潺潺

瞿唐行

四月欲盡五月來峽中水漲何雄哉浪花高飛暑路雪灘
石怒轉晴天雷千艘萬舸不敢過篙工柁師心膽破人人
陰拱待勢衰誰敢輕行犯奇禍一朝時去不自由山腹空
有沙痕畱君不見陸子歲暮來夔州瞿唐峽水平如油

山寺

籃輿送客過江村小寺無人半掩門古佛負牆塵漠漠孤
燈照殿雨昏昏喜投禪榻聊尋夢嬾爲啼猿更斷魂要識
人間盛衰理岸沙君看去年痕

峽漲時水高數十丈至冬盡落

寒食

峽雲烘日欲成霞，灑水生紋漫見沙。又向蠻方作寒食，強持卮酒對梨花。身如巢燕年年客，心羨游僧處處家。賴有春風能領略，一生相伴遍天涯。

風雨中望峽口諸山奇甚戲作短歌

白鹽赤甲天下雄，拔地突兀摩蒼穹。凜然猛士撫長劍，空有豪健無雍容。不令氣象少滄瀆，常限天地無全功。今朝忽悟始歎息，妙處元在煙雨中。太陰殺氣橫慘淡，元化變態含空濛。正如奇材遇事見，平日乃與常人同。安得朱樓高百尺，看此疾雨吹橫風。

久病灼艾後獨卧有感

白帝城高暮柝傳，幽窗搔首意蕭然。江邊雲溼初橫雁，牆下桐疎不庇蟬。計出火攻傷老病，卧聞鳶墮歎蠻煙。諸賢好試平戎策，歛退無心競著鞭。

小市

小市門前沙作隄，杏花雖落不需泥。客心尚壯身先老，江水方東我獨西。慙慙軒窗仍汛掃，遠遊書劍亦提攜。子規應笑飄零慣，故傍茆簷盡意啼。

蟠龍瀑布

遠望紛珠纓，近觀轉雷霆。人言水出奇，意使行人驚人驚。我何得定非水之情，水亦有何情。因物以賦形，處高勢趨下。豈樂與石爭退之，亦隘入強言不平。鳴古來賢達士，初亦願躬耕。意氣或感激，邂逅成功名。

馬上

殘年流轉似萍根，馬上傷春易斷魂。烘煖花無經日蕊，漲

溪水過去年痕迷行每問樵夫路投宿時敲竹寺門不信
太平元有象牛羊點點散煙村

鄰水延福寺早行

化蝶方酣枕問鷄又著鞭亂山徐吐日積水遠生煙流泊
真衰矣登臨獨惘然桃花應笑客無酒到愁邊酒偶盡市
醪不可飲

岳池農家

春深農家耕未足原頭叱叱兩黃犢泥融無塊水初渾雨
細有痕秧正綠綠秧分時風日美時平未有差科起買花
西舍喜成婚持酒東鄰賀生子誰言農家不入時小姑晝
得城中眉一雙素手無人識空村相喚看縑絲農家農家
樂復樂不比市朝爭奪惡宦游所得真幾何我已三年廢
東作

果州驛

驛前官路堠纍纍歎息何時送我歸池館鶯花春漸老窗
扉燈火夜相依孤鸞怯舞愁窺鏡老馬貪行強受鞮到處
風塵常撲面豈惟京洛化人衣

聞杜鵑戲作

半世羈游厭路岐憑鞍日日數歸期勞君樹上叮嚀語似
勸飢人食肉糜

老君洞

有石刻載唐明皇幸蜀見老君於此

丹鳳樓頭語未終崎嶇蜀道復相逢太清宮闕俱煨燼豈
亦南來避賊鋒

簡章德茂

殊方邂逅豈無緣世事多乖復悵然造物無情吾輩老古

人不死此心傳
冷雲黯黯朝橫棧
紅葉蕭蕭夜滿船
箇裏約君同著句
不應輸與灞橋邊

太息宿青山舖作

太息重太息
吾行無終極
冰霜迫殘歲
身獸號落日
秋砧滿孤村
枯葉擁破驛
白頭鄉萬里
墮此虎豹宅
道邊新食人膏血
染草棘平生鐵石心
忘家思報國
卽今冒九死
家國兩無益
中原久喪亂
志士淚橫臆
切勿輕書生
上馬能擊賊

淒淒復淒淒
山路窮攀躋
僕病卧草間
馬困聲酸嘶
脫兔截道犇窮狄
上樹啼崩湍
一何哀下落
萬仞谿昏黑
投孤戍洗我衣
上泥下愚不可遷
大惑終身迷
仕宦十五年
曾不飽糠粃
客路少睡眠
月白聞號鷄
欲行且復止
虎來茆

葉低

閬中作

挽住征衣爲濯塵
閬州參釀絕芳醇
鴛花舊識非生客
山水曾遊是故人
遨樂無時冠巴蜀
語音漸正帶咸秦
平生賸有尋梅債
作意城南看小春

赴成都泛舟自三泉至益昌謀以明年下三峽

詩酒清狂二十年
又摩病眼看西川
心如老驥常千里
身似春蠶已再眠
暮雪烏奴停醉帽
秋風白帝放歸船
飄零自是關天命
谿被人呼作地仙

雪晴行益昌道中頗有春意

杜陵雁下歲將殘
疋馬西遊雪擁關
顛顛敢忘雙闕路
淹遲遍看兩川山
春回柳眼梅鬚裏
愁在鞭絲帽影間
安得

黃金成大藥爲人千載駐顏顏

綿州魏成縣驛有羅江東詩云芳草有情皆礙馬好
雲無處不遮樓戲用其韻

老夫棄輿忽西遊遠跨秦吳萬里秋尊酒登臨遍山寺歌
辭散落滿江樓孤城木葉蕭蕭下古驛灘聲瀉瀉流未許
詩人誇此地茂林脩竹憶吾州

晚春書懷

老客天涯心尚孩惜春直欲挽春回長繩縱繫斜陽住右
手難移故國來暑近蚊雷先隱鱗雨前蟻垤正崔嵬茹芝
却粒終無術萬事惟須付一盃

晚登望雲

一出修門又十年輩流多已珥金蟬衰如蠹葉秋先覺愁
似鰥魚夜不眠輦路疎槐迎駕處苑城殘日泛湖天君恩
未報身今老徒倚危樓一泫然

醉中感懷

早歲君王記姓名只今顛顛客邊城青衫猶是鷓行舊白
髮新從劍外生古戍旌旗秋慘淡高城刁斗夜分明壯心
未許全消盡醉聽檀槽出塞聲

晚雨

蕭瑟度橫塘霏微映繚牆壓低塵不動灑急土生香聲入
楸梧碎清分枕簟涼回頭忽陳迹簷角挂斜陽

社日

百穀登場酒滿卮神林簫鼓晚清悲蟬依疎柳長言處燕
委空巢大去時幼學已忘那用忌

社日忌習業微聲自樂

不須醫古謂社酒治藥傷心故里雞豚集父老逢迎正見息

寒夜遣懷

臨觴本不飲憂多自成醉四方行萬里不見埋憂地憶昔人京都寶馬搖香鬃酣飲青樓夜歌聲在半空去日不可挽華髮忽垂頰娟娟峨眉月相對作妻冷月落照空床不寐聽寒蟬早知憂隨人何用去故鄉

登樓

從來好境遍人間無奈勞生自欠閒江近時時吹白雨樓高面面看青山歌聲哀怨傳三峽行色淒涼帶百蠻嘉陽近諸蠻流落愛君心未已夢魂猶綴紫宸班

西園

半掩朱門薛徑斜翠屏繡谷忽唘衙高高下下天成景密

密疎疎自往花江近夕陽迎宿鷺林昏殘角促歸鴉吾舟已繫津南岸喚客猶能一笑譁

得韓无咎書寄使時宴東都驛中所作小闕

大梁二月杏花開錦衣公子乘傳來桐陰滿地掃不得金轡玲瓏上源驛上源驛中搥画鼓漢使作客作主舞女不記宣和粧廬兒盡能女語書來寄我宴時詩歸鬢知添幾縷絲有志未須殘感慨築城會據拂雲祠唐中受降城在拂雲

曉坐

低枕孤衾夜氣存披衣起坐默忘言餅花力盡無風墮爐火灰淡到曉温空橐時時聞鼠齧小窗一一送鴉翻悠然忽記幽居日下榻先開水際門

十二月一日得梅一枝絕奇戲作長句今年於是
四賦此花矣

高標已壓萬花羣尚恐嬌春習氣存月兔擣霜供換骨湘
娥鼓瑟爲招魂孤城小驛初飛雪斷角殘鐘半掩門盡意
端相終有恨夜寒敝玉倩誰溫

快晴

地潤天門斗柄回今朝紅日遍池臺新陽蘇醒春前柳輕
暖霽洽雪後梅瓦屋螺青披霧出錦江鴨綠抱山來衰翁
也逐兒童喜旋撥文書近酒盃

春愁曲

客話成都戲作

處義至今三十餘萬歲春愁歲歲常相似外大瀛海環九
洲無有一洲無此愁我願無愁但歡樂朱顏綠鬢常如昨
金丹九轉徒可聞玉兔千年空擣藥蜀姬雙鬟姹嬌醉
看恐是海棠妖世間無處無愁到底事難過萬里橋

遊修覺寺

上盡蒼崖百級梯詩囊香椀手親攜山從飛鳥行邊出天
向平蕪盡處低花落忽驚春事晚樓高剝覺客魂迷興闌
掃榻禪房卧清夢還應到剡溪

雨後集湖上

野水交流自滿畦芳池新漲恰平堤花藏密葉多時在鷺
占高枝盡日啼繡袂寶帚催結束金樽翠杓共提攜白頭
自喜能狂在笑襍蠻牋落醉題

慈雲院東閣小憩

橫閣院東偏翛然拂榻眠香濃煙穗直茶嫩乳花圓巖倚

團團桂筒分細細泉憑誰爲題版牘作小壺天

病後暑雨書懷

髮毛蕭颯疾初平雲物輪困氣未清水漲小亭無路到雨
多幽草上牆生窗昏頓減讐書課屋老時聞墮瓦聲止酒
亡聊還自笑少年豪飲似長鯨

怡齋

東湖仲夏草樹荒屋古無人亭午涼萱房微呀不見日筍
籜自解時吹香野藤蟠屈入窗罅溼菌扶疎生屋梁跨溝
數椽最幽翳漲水及檻雨敗牆靜涵青蘋舞藻荇閒立白
鷺浮鴛鴦芙蓉雖瘦亦瀾漫照眼翠蓋遮紅粧水紋珍簾
欲卷却團團素扇嬾復將天風忽送玲鈴語喚覺清夢遊
瀟湘

寓驛舍

予三至成都皆館于是

閒坊古驛掩朱扉又憩空堂縱客衣九萬里中鯤自化一
千年外鶴仍歸遶庭數竹饒新筍解帶量松長舊圍惟有
壁間詩句在暗塵殘墨兩依依

宴西樓

西樓遺迹尚豪雄錦繡笙簫在半空萬里因循成久客一
年容易又秋風燭光低映珠簾麗酒暈徐添玉頰紅歸路
迎涼更堪愛摩訶池上月方中

江濱池醉歸馬上作

久住西州似宿緣笙歌叢裏著華顛每嗟相見多生客却
憶初來尚少年迎馬綠楊爭拂帽滿街丹荔不論錢浮生
何處非羈旅休問東吳萬里船

醉書

似聞有俸錢似仕無簿書似長免事仕似屬非走趨病能
加餐飯老與酒不疎婆娑東湖上幽曠足自娛時時喚客
醉小閣臨紅葉釣魚斫銀絲擘荔見玉膚檀槽列四十遺
聲傳故都豈惟豪兩川自足誇東吳但恨詩不進榛荒失
耘鋤何當掃纖艷傑作追黃初

東園晚步

久客天涯憶故園彊名官寺只衡門秋桐蠹遍無全葉古
柳吹斜出半根痛飲每思尊酒窄微官空羨布衣尊何時
定下三巴去息卧孤舟聽斷猿

太平花

花出劔南似桃四出千百包騷萃成朵天聖中獻至京師仁宗賜名太平花

扶牀踉蹌出京華頭白車書未一家宵旰至今勞聖主淚

痕空對太平花

秋色

一段淒涼傷酒盃中年剩作楚囚哀迢迢似伴明河出慘
慘如隨落照來客路半生常淚眼鄉關萬里更危臺蓼汀
荻浦江南岸自入秋來夢幾回

秋聲

蕭騷拂樹過中庭何處人間有此聲漲水雨餘晨放開騎
兵戰罷夜還營聞憑曲几聽雖久彊撫哀弦寫不成暑退
涼生君勿喜一年光景又崢嶸

龍眠畫馬

國家一從失西陲年年買馬西南夷瘴鄉所產非權奇邊
頭歲入幾番一作數皮崔嵬瘦骨帶火印離立欲不禁風吹

金言金
十六
園人太僕空列位龍媒汗血來何時李公太平官京師立
仗慣見滌注姿斷綠歲久墨色暗逸氣尚若不可羈賞奇
好古自一癖感事憂國空餘悲嗚呼安得毛骨若此三千
正銜枚夜度桑乾磧

秋夜池上作

短髮颺颺病骨輕臨池閒看露荷傾月明何與浮雲事正
向圓時故故生

夜食炒栗有感

漏舍待朝朝士往往食此

齒根浮動歎吾衰山栗炮燔療夜飢喚起少時京輦夢和
寧門外早朝時

晚登橫溪閣

樓鼓聲中日又斜憑高愈覺在天涯空桑客土生秋草野
渡虛舟集晚鴉瘴霧不開連六詔俚歌相答帶三巴故鄉
可望應添淚莫恨雲山萬疊遮

犖确坡頭筇竹枝

西臨村路立多時賣蔬近市還家早煮

井人忙下麥遲

榮多臨井秋冬收新芽病客情懷常怯酒山城老

景盡供詩晚來試問愁多少只許高樓橫笛吹

自唐安徙家來和義出城迎之馬上作

身如林下僧處處常寄包家如梁上燕歲歲旋作巢豈惟
人所憐顧影每自嘲眼看佳山水不得結把茅造物困豪
傑如視餓虎哮要令出精神感激使叫呶頗思投筆去走
馬盤雲旃三更冒急雪大戰梁楚郊

花時遍遊諸家園

看花南陌復東阡曉露初乾日正妍走馬碧鷄坊裏去市

人喚作海棠顛

爲愛名花抵死狂，只愁風日損紅芳。綠章夜奏通明殿，乞借春陰護海棠。

翩翩馬上帽簷斜，盡日尋春不到家。偏愛張園好風景，半天高柳卧溪花。

花陰掃地置清尊，爛醉歸時夜已分。欲睡未成欹枕輪，困帳底見紅雲。

宣華無樹著啼鶯，惟有摩訶春水生。故老能言當日事，直將宮錦裹宮城。

絲絲紅萼弄春柔，不似疎梅只慣愁。常恐夜寒花索寞，錦茵銀燭按涼州。

春寒連日不出

海棠花入燕泥乾，梅子枝頭已帶酸。老去嬾尋年少夢，春分不減社前寒。著書敢望垂千載，嗜酒猶須隱一官。正是閒時無客過，小庭斜日倚闌干。

馬上偶成

城南城北紫遊韉，盡日閒行看似忙。刺水離離葛葉短，連村漠漠豆花香。夕陽有信催殘角，春草無情上繚牆。我亦人間倦遊者，長吟聊復愴興亡。

夜宴

酒浪搖春不受寒，燭花垂燼忽堆盤。山川路邈人將老，絲管聲遒夜向闌。四海交朋更聚散，百年光景雜悲歡。自憐病眼猶明在，更把名花半醉看。

是夕得范希元家晚海棠數枝繁麗一城所無

錦亭

天公爲我齒頰計遣飫黃甘與丹荔又憐狂眼老更狂令
看廣陵芍藥蜀海棠周行萬里逐所樂天公於我元不薄
貴人不出長安城寶帶華纓真汝縛樂哉今從石湖公大
度不計聾丞聾夜宴新亭海棠底紅雲倒吸玻璃鍾琵琶
弦繁腰鼓急盤鳳舞衫香霧溼春醪凸盞燭光搖素月中
天花影立遊人如雲環玉帳詩未落紙先傳唱此邦句律
方一新鳳閣舍人今有樣

雨

映空初作繭絲微掠地俄成箭鏃飛紙帳光暈饒曉夢銅
鑪香潤覆春衣池魚鱗鱗隨溝出梁燕翩翩接翅歸惟有
落花吹不去數枝紅溼自相依

春殘

石鏡山前送落暉春殘回首倍依依時平壯士無功老鄉
遠征人有夢歸首藉苗侵官道合蕪菁花入麥畦稀倦游
自笑摧頽甚誰記飛鷹醉打圍

小飲房園

宦遊到處卽忘家况得閒身官物華疎索故人緣病酒折
除厚祿爲看花泥新高棟初巢燕萍匝荒池已集蛙斟酌
人生要行樂燈前起舞落烏紗

卜居

歷盡人間行路難老來要覓數年閒供家米少因添鶴買
宅錢多爲見山池面紋生風細細花根土潤雨斑斑借春
乞火依鄰里剩釀村醪約往還

小疾謝客

小疾深居不喚醫，消搖更覺勝平時。癡人未害看周易，名士真須讀楚辭。綠徑風斜花片片，畫廊人靜雨絲絲。晚來頓覺清羸甚，自置篝爐煮粟糜。

過野人家有感

縱轡江臯送夕暉，誰家井臼映荆扉。籬犬吠窺人過滿，箔蠶飢待葉歸。吳人直謂桑曰葉世態十年看爛熟，家山萬里夢依稀。躬耕本是英雄事，老死南陽未必非。

閒中偶題

楚澤巴山歲歲忙，今年睡足向禪房。只知閒味如茶永，不放羈愁似草長。架上漢書那復看，牀頭周易亦相忘。客來拈起清談麈，且破西窗半篆香。

五年前舊史官，花底清歌春載酒。江邊明月夜投竿，癡頑直爲多更事。莫怪曾懷抵死寬。

晚過五門

五門路四月乳鴉啼，綠樹閒游但喜日初長。薄暑始知春已去，樓頭風高舞雙旗。畫角聲中日還暮，馬蹄特特無斷時。老盡行人路如故。

月下醉題

黃鵠飛鳴未免飢，此身自笑欲何之。閉門種菜英雄老，彈鋏息魚富貴遲。生擬入山隨李廣，死當穿冢近要離。一樽疆醉南樓月，感慨長吟恐過悲。

和范待制秋興

策策桐飄已半空，啼螿漸覺近房櫳。一生不作牛衣泣，萬

事從渠馬耳風名姓已甘黃紙外光陰全付綠尊中門前
剝啄誰相覓賀我今年號放翁
睡臉餘痕印枕紋秋衾微潤覆~~心~~巢井桐搖落先霜盡衣
杵淒涼帶月聞佛屋沙燈明小隊經奩魚蠹蝕真文身如
病驥惟息卧誰許能空萬馬羣

春愁

春愁茫茫塞天地我行未到愁先至滿眼如雲忽復生尋
人似瘴何由避客來勸我飛~~筇~~壽我笑謂客君罷休醉自
醉倒愁自愁愁與酒如風馬牛

關山月

和我詔下十五年將軍不戰空臨邊朱門沉沉按歌舞廐
馬肥死弓斷弦戍樓刁斗催落日三十從軍今白髮笛裏

誰知壯士心沙頭空照征人骨中原干戈古亦聞豈有

傅子孫遺民忍死望

幾處今宵垂淚痕

和范舍人書懷

歲月如奔不可遮卽今楊柳已藏鴉客中常欠尊中酒馬
上時看檐上花末路淒涼老巴蜀少年豪舉動京華天魔
久矣先成佛多病維摩尚在家

幽居

殊方飄泊向誰論小住僧廬亦所欣得飽罷揮求米帖愛
眠新著毀茶文摘蔬籃小霑清露斲藥鉏輕帶溼雲從此
生涯足幽事宦遊虛用半生勤

浣溪女

一作浣花女

江頭女兒雙鬢丫常隨阿母供桑麻當戶夜織聲唧啞地

爐豆薰煎土茶長成嫁與東西家柴門相對不上車青裙
竹筍何所嗟插髻燦燦牽牛花城中妖姝臉如霞爭嫁官
人慕高華青驪一出天之涯年年傷春抱琵琶

悲秋

一拋簑笠雪溪舟八載涼州復益州纔破繁華海棠夢又
驚搖落井梧秋曉班無復趨行殿晚境惟思老寢丘病肺
經旬疎酒盞愁來惟是上南樓

雨中山行至松風亭忽澄霽

煙雨千峰擁鬢鬟忽看青嶂白雲間卷藏破墨營丘筆却
展將軍著色山

秋興

戒郿城中秋夜長燈籠蠟紙明空堂高梧月白繞飛鵲衰

草露溼啼寒蠶堂上書生讀書罷欲眠未眠偏斷腸起行
百匝幾歎息一夕綠髮成秋霜中原 月用 曆 州老
著柘黃榮河溫洛底處所可使長作旃裘鄉百金戰袍
鵬鵠盤三尺劍鋒霜雪寒一朝出塞君試看且發寶鷄茸
長安

暇日行城上同行追不能及

疾步登城殊未衰欣然一笑擲筇枝正當閒似白鷗處不
減健如黃犢時秋野煙雲橫慘淡暮天樓閣倚參差高吟
醉舞忘歸去乞與丹青畫怪奇

江樓醉中作

淋漓百榼宴江樓秉燭揮毫氣尚遒天上但聞星主酒人
間寧有地理憂生希李廣名飛將死慕劉伶贈醉侯戲語

佳人頰一笑錦城已是六年留

退之詩云越女一笑三年

車策 遊房園作

慈竹蕭森興廢臺醉歸曳策一徘徊紛紛落日牛羊下黯黯長空霰雪來三峽猿催清淚落兩京梅傷戰塵開客懷已是淒涼甚更聽城頭畫角哀

謁漢昭烈惠陵及諸葛公祠宇

雨止風益豪雪作雲不動淒涼漢陵廟衰草卧翁仲畫妓空笙竿土馬關羈鞅壤沃黃犢耕柏密幽鳥哢尚想忠武公身任社稷重整整渭上營氣已無岐雍少須天意定破賊寧患衆興亡信有數星隕事可痛陵邊四五家茆竹居接棟手輒紙上箔居民皆以造紙爲業醇熟酒鳴甕雖嗟生理微亦足道飢凍劉葛固雄傑閱世均一夢論高常近迂才大本

難用九原不可作再拜臨風

遠遊

遠遊行復歲華新嬾學劉郎問大鈞一點不蒙稽古力十分合作卧雲身苦寒與酒頓增價小雨爲梅先辟塵擬佩一壺江路去花邊醉墮白綸巾

簡譚德稱

幼輿骨相稱山巖自要閒遊不避讒錦里先生爲老伴玉霄散吏是頭銜探春苑路花簪帽看月江樓酒滿衫惟恨題詩無逸氣媿君陣馬與風颿

閒意

柴門雖設不曾開爲怕人行損綠苔妍日漸催春意動好風時捲市聲來學經妻問生疎字嘗酒兒斟澁盃安得

小園寬半畝黃梅綠李一時栽

南定樓遇急雨

行遍梁州到益州今年又作度瀘遊江山重複爭供眼風雨縱橫亂入樓人語朱離逢峒獠棹歌款乃下吳舟天涯住穩歸心懶登覽茫然却欲愁

漁翁

江頭漁家結茆廬青山當門画不如江煙淡淡雨疎疎老翁破浪行捕魚恨渠生來不讀書江山如此一句無我亦衰遲慙筆力共對江山三歎息

龍興寺吊少陵先生寓居

中原艸艸失承平戊火應到兩京扈蹕老臣身萬里天寒來此聽江聲以少陵詩考之蓋以秋冬間寓此州也寺門開江聲甚壯

楚城

江上荒城猿鳥悲隔江便是屈原祠一千五百年間事只有灘聲似舊時

出遊

萬里崎嶇蜀道歸荆州非復壯遊時行吟自怪詩情減坐睡人驚酒量衰卷地風號雲夢澤黏天艸映伏波祠一枝藤杖平生事擊鼓開帆未恨遲

初發荆州

淋漓牛酒起檣干健艚飛如插羽翰破浪乘風千里快開頭擊鼓萬人看鵲聲不斷朝陽出旗脚微舒宿雨乾堪笑塵埃洛陽客素衣如墨據征鞍

泊公安縣

秦關蜀道何遠哉
公安渡頭今始回
無窮江水與天接
不斷海風吹月來
船窗簾捲螢火鬧
沙渚露下蘋花開
少年許國忽衰老
心折柁樓長一作笛哀

舟中偶書

老子西遊萬里回
江行長夏亦佳哉
晝眠初起報茶熟
宿酒半醒聞雨來
漢口船開催疊鼓
淮南帆落亞高桅
四方本是丈夫事
白首自憐心未灰

舟行蘄黃間雨霽得便風有感

天青雲白十分晴
帆飽舟輕盡日行
江底魚龍貪晝睡
淮南艸木俗秋聲
好山縹緲何由住
華髮蕭條只自驚
莫怪時人笑疎嬾
宦情元不似詩情

六月十四日宿東林寺

看盡江湖千萬峰
不嫌雲夢芥吾胸
戲招西塞山前月
來聽東林寺裏鐘
遠客豈知今再到
老僧能記昔相逢
虛窗熟睡誰驚覺
野碓無人夜自舂

登賞心亭

蜀道秦關歲月迢
今年乘興却東遊
全家穩下黃牛峽
半醉方尋白鷺洲
黯黯江雲瓜步雨
蕭蕭木葉石城秋
孤臣老抱憂時意
欲請遷都涕已流

將至京口

卧聽金山古寺鐘
三巴昨夢已成空
船頭坎坎回帆鼓
旗尾舒舒下水風
城角危樓晴靄碧
林間雙堦夕陽紅
銅瓶愁汲中濡水
不見茶山九十翁

沂谿

頃在京口嘗取中濡水寄曾文清公

射的峰前禹廟東，短蓬三扇臥衰翁。閒攜清聖濁賢酒，重
試朝南算北風。水落痕留紅蓼節，雨來聲滿綠蒲叢。衝煙
莫作匆匆去，擬看溪丁下釣筒。

歸雲門

萬里歸來值歲豐，解裝鄉墅樂無窮。甌炊飽雨湖菱紫，篋
絡迎霜野柿紅。壞壁塵埃尋醉墨，孤燈餅餌對鄰翁。微官
行矣，聞山去，又寄千巖夢想中。

題齋壁

葺得湖邊屋數椽，茆齋低小竹窗妍。墟煙寂歷歸村路，山
色蒼寒釀雪天。性懶杯盤常偶爾，地偏鷄犬亦翛然。早知
粟里多幽事，虛走人間四十年。

吾廬

吾廬雖小亦佳哉，新作柴門斲綠苔。拄杖每聞歸鶴入，釣
船時帶夕陽來。墟煙隔水霏霏合，籬菊凌霜續續開。千里
安期那可得，笑呼鄰父共傳杯。

自雲門之陶山，肩輿者失道行亂山，中有茅舍小塘，
極幽邃，求見主人不可，意其隱者也。

陂池幽處有茅堂，井白蕭條草樹荒。小鴨怯波時聚散，病
蔬傷蠹半青黃。兒童衝雨收魚網，婢子聞鐘上佛香。我亦
算年思屏跡，數椽何計得連牆。

冬夜聽雨戲作

少年交友盡豪英，妙理時時得細評。老去同參惟夜雨，焚
香卧聽兩簷聲。

遠簷照榻如琴筑，支枕幽齋聽始奇。憶在錦城歌吹海，七

金言金
三十一
昨夜雨不曾知

梅花絕句

濯錦江邊憶舊遊
纏頭百萬醉青樓
如今莫索梅花笑
古驛燈前各自愁

蜀王小苑舊池臺
江北江南萬樹梅
只怪朝來歌吹鬧
園

官已報五分開
成都合江園蓋故蜀別苑梅最盛自初開
監官日報府報至開五分則府主來晏遊

人亦競集

探春歲歲在天涯
醉裏題詩字半斜
今日谿頭還小飲
冷官不禁看梅花

池館登臨雪半消
梅花與我兩無聊
青羊宮裏應如舊
腸

斷春風萬里橋

客思

裘馬平生喜遠遊
算年顛顛向南州
文書與睡中分日
衰病和愁總怕秋
無復雪郊看射虎
但息煙浦聽呼牛
還家誰道無餘俸
倒橐猶堪買釣舟

初秋夢故山覺而有作

昔我東歸時
父老迎船頭
開篷相勞苦
怪我領雪鬍
故山何負君
且作數月留
豈知席未煖
疋馬來南州
蠻花四時紅
瘴霧日夜浮
歸哉不可遲
勿與婦子謀

杜宇真吾交
勸去恨不速
忠告輸肝肺
厚意均骨肉
陋哉鷓鴣語
揣我貧念祿
竹雞更鄙淺
泥淖憂車軸
秋風嚴瀨清
春雨戴溪綠
行矣勿復疑
照影巾一幅

追感梁益舊遊有作

西遊萬里倚朱顏
肯放尊前一笑慳
蜀苑妓圍欺夜雪
梁

州獵火滿秋山晚途忽墮塵埃裏樂事渾疑夢寐間浮世
變遷君勿歎劇談猶是詫鄉賢

聞雁

過盡梅花把酒稀黛籠香冷換春衣秦關漢苑無消息又
在江南送雁歸

登擬峴臺

層臺縹緲壓城闌倚杖來觀浩蕩春放盡尊前千里日洗
空衣上十年塵縈迴水抱中和氣平遠山如醞籍人更喜
機心無復在沙邊鷗鷺亦相親

雨中遣懷

病中草草度年華睡起昏昏日易斜抵死愁禁千斛酒薄
情雨送一城花鏡湖煙水搖朱舫錦里香塵走劍車此夢
卽今都打破不妨寂寞住天涯

三月二十一日作

蹴踘牆東一市譁鞦韆樓外兩旗斜及時小雨放桐葉無
賴餘寒開楝花明月吹笙息蜀苑軟塵騎馬夢京華懽情
減盡朱顏改節物催人只自嗟

五月十一日夜且半夢從大駕親征盡復漢唐故地
見城邑人物繁麗云西涼府也喜甚馬上作長句
未終篇而覺乃足成之

天寶

兵陷兩京北庭安西無漢營五百年間置不問聖
主下詔初親征熊羆百萬從鑿駕故地不勞傳檄下築城
絕寒進新圖排仗行宮宣大赦岡巒極目漢山川文書初
用淳熙年駕前六軍鎔錦繡秋風鼓角聲滿天首宿峰前

盡亭障平安火在交河上涼州女兒滿高樓梳頭已學京
都樣

長歌行

燕燕尾涎涎橫穿乞巧樓低入吹笙院鴨鴨黃啞啞朝浮
杜若洲算宿蘆花夾嗟爾自適天地間將倚命侶意甚開
我今獨何爲一笑乃爾慳世上悲歡亦偶然何時爛醉錦
江邊人歸華表三千歲春入箜篌十四絃

送客城西

倦客憑鞍半醉醒秋光滿眾歎頽齡日斜野渡放船小風
急漁村攤網腥客息不堪問斷雁詩情彊半在鄰亭歸來
更恨城笳咽烟火昏昏獨掩屏

休日

賜休暫許養衰殘靜院翛然晝掩關釀酒移花調護悶弄
琴洗硯破除閒與人多忤讒消骨報國無功愧滿顏一寸
歸心向誰說小屏依約剡中山

新釀熟小酌索笑亭

新酒黃如脫殼鵝小園持盞暫婆娑文章不進技止此仕
宦忘歸人謂何宿業薄書昏病眼夢遊煙雨溼漁叢醉中
笑向兒童說白髮今年添幾多

豐城高安之間憇民家景趣幽邃爲之慨然懷歸
數家聚雲根細路入叢薄濺濺石渠水來往一略約有無
鄰里通笑語婦子樂濁醪時相就青蔬缺鹽酪日暮歸閉
門積火星煜燐先期畢租稅老不入城郭嗟予獨何事早
插紅塵脚故山未成歸悵望有餘忤

北窗

九陌黃塵早莫忙，幽人自愛北窗涼。
清吟微變舊詩律，細字閒鈔新酒方。
艸木扶疎春已去，琴書蕭散日初長。
破羌臨罷楷頤久，又破銅匱半篆香。

西村醉歸

俠氣呼噉蓋九州，一生常恥為身謀。
酒寧剩欠尋常債，劍不虛施細碎讎。
見孟東野詩岐路凋零白羽箭，風霜破弊黑貂裘。
陽狂自是英豪事，村市歸來醉跨牛。

醉中登避暑臺

半醉行歌上古臺，脫巾散髮謝氛埃。
但知禮豈為我設，莫管客從何處來。
剡曲煙波菱蔓滑，耶溪風露藕花開。
老來世事渾成懶，一櫂幽尋未擬回。

病中夜興

病瘡秋來久未平，艸堂遙夜不勝清。
疾風遞響驚林葉，列宿收芒避月明。
百計不能逃白髮，一生堪笑役虛名。
釣車且作桐江夢，莫念安西萬里行。

霜天晚興

薄霜門巷不勝清，小立湖邊夕照明。
紅顚帶芒收晚稻，綠苞和葉摘新橙。
閒評琴價留僧話，靜聽松聲領鶴行。
壯志消磨渾欲盡，西風莫動玉關情。

杜門

寂寞山深處，崢嶸歲暮時。
燒灰除菜蝗，讀如橫字去聲送芋謝牛醫。
覓水晨澆藥，燈窗夜覆棋。
杜門君勿怪，遲暮少新知。
忽忽

忽忽復悠悠頻驚歲月適若無船貯酒將奈斛量愁列炬

燕宮夜成都故蜀時燕王宮今屬張氏海棠為一城之冠呼鷹漢廟秋南漢高帝廟予從

戎時多周年莫多感夢境付滄洲

冬夜不寐至四鼓起作此詩

秦兵萬里車轍遍重到故鄉如隔生歲晚酒邊身老大夜

闌枕畔書縱橫殘燈無焰穴鼠出稿葉有聲村犬行八十

將軍能滅虜白頭吾欲事功名高麗有譏云當有八十六老將平之李英公實膺是讖

蔬圃

山翁老學圃自笑一何愚饒瘠財三畝勤劬賴兩奴正方

畦畫局微潤土融酥剪闌荆榛盡鉏犁磊塊無過溝橫略

約聚甕起浮屠拾園中瓦隙地成瓜援餘功及芋區如絲

細生菜似鴨爛蒸壺此事今真辦東歸不為鱸

累日無酒亦不肉食戲作此詩

小築精廬剡曲傍枵然蟬腹與龜腸酒錢覓處無司業齋

日多來似太常雲確旋春菰米滑風爐親候藥苗香明年

更入南山去要試囊中服玉方

陶山遇雪覺林遷菴主見招不果往

山中大雪二尺彊道邊虎迹如椀大衰翁畏虎復畏寒招

喚不來公勿怪梨花開時好風日走馬尋公作寒食不須

沽酒飲陶潛箭筈蕨芽如蜜甜

夏夜舟中聞水鳥聲甚哀若曰姑惡感而作詩

女生藏深閨未省窺牆藩上車移所天父母為它門妾身

雖甚愚亦知君姑尊下牀頭雞鳴梳髻著襦裙堂上奉灑

掃厨中具盤殮青青摘葵莧恨不美熊蹯姑色少不怡衣

袂溼淚痕所冀妾生男庶幾姑弄孫此志竟蹉跎薄命來
讒言放棄不敢怨所悲孤大恩古路徬陂澤微雨鬼火昏
君聽姑惡聲無乃遣婦魂

雨夜

急雨如河瀉瓦溝空堂卧對一燈幽老雞多事彊知曉落
葉無情先報秋身未蓋棺誰可料尊常有酒莫閒愁功名
老大從來事且復長歌起飯牛

鄰曲小飲

早稻喜登場相呼集野堂迎霜新兔美近社濁醪香茆屋
滴殘雨竹籬圍夕陽新豐不須作真箇是吾鄉

題酒家壁

明主何曾棄不才書生飄泊自堪哀煙波東盡江湖遠雲

棧西從隴蜀回宿雨送寒秋欲晚積衰成病老初來酒香
菰脆丹楓岸強遣樽前笑口開

幽居書事

莫嘆人間苦不諧清時有味是歸來已因積毀成高卧更
借陽狂護散才正欲清言聞客至偶思小飲報花開紛紛
爭奪成何事白骨生苔但可哀

紹興中與陳魯山王季夷從兄仲高以重九日同遊
禹廟後三十餘年自三橋泛舟歸山居秋高雨霽
望禹廟樓殿重複光景宛如當時而三人者皆下
世予亦衰病無聊慨然作此詩

重樓傑閣倚虛空紅日蒼煙正鬱葱鄉國歸來渾似鶴交
朋零落不成龍人生真與夢何按我輩故應情所鍾淚漬

清詩却回棹不眠一夜聽鳴蛩

過村店有感

細篾絡丹柿枯籬懸碧花炊煙生旅竈野水漱寒沙棲鳥爭投樹歸牛自識家恍然遊蜀路搔首憶天涯

骨相

骨相元知薄功名敢自期病侵彊健日開過聖明時形勝輪臺地飛騰瀚海師江湖雖萬里猶擬撥聲詩

意改 蜀人謂其實為薏米唐安所出尤奇

初遊唐安飯薏米炊成不減雕胡美大如芡實白如玉滑欲流匙香滿屋腹腴項鬢不入盤况復殮酪誇甘酸東歸思之未易得每以問人人不識嗚呼奇材從古棄艸菅君試求之離落間

鄉人病子詩多道蜀中遊樂之盛適春日遊鏡湖共

請賦山陰風物遂卽杯酒間作絕句嘗持以誇西

州故人也

嬾日輕雲淡迤天撲燈過後賣花前便從水閣杭湖去捲起朱簾上畫船

舫子窗扉面面開金壺桃杏間尊疊東風忽送笙歌近一片樓臺泛水來

病中

風雨暗江天幽窗起復眠忍窮安晚境留病壓災年客助脩琴料僧分買藥錢餘生均逆旅未死且陶然

初夏游凌氏小園

水滿池塘葉滿枝曲廊危榭愜幽期風和海燕分泥處日

永吳蠶上簇時閒理阮咸尋舊譜細傾白墮賦新詩從來
夏淺勝春日兒女紛紛豈得知庾信詩云夏淺却勝春鏡湖遊人至立夏而止

賽神曲

叢祠千載臨江渚拜賦今年那可數須晴得晴雨得雨人
意所向神輒許嘉禾九穗持上府廟前女巫遞歌舞嗚嗚
歌謳坎坎鼓香煙成雲神降語大餅如粢牲膾肥再拜獻
神神不違晚來人醉相扶歸蟬聲滿廟鎖斜暉

秋夜

老病龍鍾不入城濁醪麤飯餞餘生未霜村舍秋先冷無
月江邊夜自明出塞雖慙平賊手下帷聊喜讀書聲山童
暝熟青燈暗自撥殘爐候藥鑿

得所親廣州書

音信連年恨不聞書來細讀却消魂入稀野店山魃語路
僻蠻村荔子繁毒草自搖春寂寂瘴雲不動晝昏昏此生
相見應無日且置清愁近一樽

西路口山店

日薄霜清十月天馬蹄聲裏送流年店當古路三叉處山
似孤雲兩角邊孤雲兩角在漢中淹泊自悲窮不醒衰殘更覺病
相纏榆關瀚海知何在目送飛鴻入暮煙

冬夜與溥菴主說川食戲作

唐安薏米白如玉漢嘉枏脯美勝肉大巢初生蚕正浴小
巢漸老麥米熟龍鶴作羹香出釜木魚淪菹子盈腹未論
索麩與饋飯最愛紅糟并飯粥東來坐閱七寒暑未嘗舉
箸忘吾蜀何時一飽與子同更煎土茗浮甘菊

野飲

青山千載老英雄濁酒三盃失
阨窮訪古顏垣荒塹裏覓
交屠狗賣漿中平堤漸放
春蕪綠細浪遙翻夕照紅
已把殘年付天地騎牛吹笛
伴村童

春晚至山中因訪陳道人

一春衰病集殘骸太息流塵
覆酒杯僧鉢始知尊菜老佛
瓶初見杏花開蘋溪小雨成
幽討松院斜陽又獨來不為
愛閒從野叟年來萬事學低
摧

病起

山村病起帽圍寬春盡江南
尚薄寒志士淒涼閒處老名
花零落雨中看斷香漠漠便
支枕芳草離離悔倚闌收拾
吟牋停酒椀年來觸事動憂
端

芒種後經旬無日不雨偶得長句

芒種初過雨及時紗厨睡起
角巾欹凝雲不散常遊墟野
水無聲自入池綠樹晚涼鳩
語鬧画梁晝寂燕歸遲閒身
自喜渾無事衣履熏籠獨誦
詩

秋夜泊舟亭山下

逢水逢山到處爾可憐身世
寄孤舟一汀蘋露漁村晚十
里荷花野店秋羽檝未聞傳
塞外金椎先報擊衙頭聞行
為壯士所攻幾不免煌煌太白高千丈那得功名取次
語所在為衙頭

休

初秋山中作

萬里西風吹幅巾即今真箇是
閒人堆盤菱熟燕脂角藕簪
藻鱸新淡墨鱗姥嶺寒蟻薄
雪徑娥江孤艇繫煙津飄然

樂事真當勉遠付十年無此身

臨安春雨初霽

世味年來薄似紗誰令騎馬客京華小樓一夜聽春雨淡
巷明朝賣杏花矮紙斜行閒作草晴窗細乳戲分茶素衣
莫起風塵歎猶及清明可到家

飲張功父園戲題扇上

寒食清明數日中西園春事又匆匆梅花自避新桃李不
爲高樓一笛風

聞傅氏莊紫笑花開急棹小舟觀之

日長無奈清愁處醉裏來尋紫笑香漫道閒人無一事逢
春也似蜜蜂忙

鹹齏十韻

九月十月屋瓦霜家人共畏畦蔬黃小兒大驚盛條濯青
菘綠韭謹蓄藏天氣初寒手訣妙吳鹽正白山泉香挾書
旁觀穉子喜洗刀竭作厨人忙園丁無事臥曝日棄葉狼
籍堆空廊泥爲緘封糠作火守護不敢非時嘗人生各自
有貴賤百花开時促高宴劉伶病醒相如渴長魚大肉何
由薦凍壘此際價千金不數狐泉槐葉麪摩挲便腹一欣
然作歌聊續水壺傳

遣興

莫羨朝回帶萬釘吾曹夢可草堂靈風來弱柳搖官綠雲
破奇峰湧帝青聽盡啼鶯春欲去驚回夢蝶醉初醒從教
俗眼憎疎放行矣桐江醅客星

小憩村舍

藤梢維艇子煙際覓人家小婦簪新麥羣童摘晚茶溪雲
易成雨崖樹少開花聊寄平生快青鞵到若耶

雨後

礎潤還成雨雲收旋作晴巖花分日發林筍逐番生筆硯
行囊具軒窗晚更明塵埃幸不到那得廢詩情

自上竈過陶山

宿雨初收見夕陽縱橫流水入波塘蚕家忌客門門閉茶
戶供官處處忙綠樹村邊停醉帽紫藤架底倚胡牀不因
蕭散遺塵事那覺人間白日長

排悶

老去知心少流塵鎖斷絃尊空問字酒囊罄作碑錢掃葉
供朝爨和泥補漏船胸中元浩浩白眼望青天

題空壁

二十餘年此結茆園公谿父日論交風翻半浦亂荷背雨
放一林新笋梢隔葉晚鶯啼谷口啜花雛鴨聚塘坳出門
行罷還無事借得丹經手自抄

拜旦表

一封馳奏效嵩呼清蹕何時返故都只道建炎巡狩禮誰
知故事自祥符

安流亭俟客不至獨坐成詠

憶昔西征鬢未霜拾遺陳迹吊微茫蜀江春水千帆落禹
廟空山百草香馬影斜陽經劍閣鶻聲清曉可瞿唐酒徒
雲散無消息水榭憑欄淚數行

歲晚書懷

早見龍翔上太清紹興末游官玉牒所卽今孤宦老山城靈丹不解
換凡骨薄命在教生太平積雪樓臺增壯觀近春鴻雀有
和聲如山吏牘何時了惆悵西窗晚照明

雪中忽起從戎之興戲作

孤裘卧載錦駝車酒醒水髭結亂珠三尺馬鞭裝白玉雪
中畫字草軍書

鸞堂春夜

南樓統統下疎更一點紗籠滿院明映月疎梅入簾影讀
書穉子隔窗聲呻吟藥裏身寧久汛掃塵意未平草檄

北征今二紀山城仍是老書生游嘗爲丞相陳魯公史樞相張魏公草檄原及西夏書檄於都堂

東竺偶書

華髮蕭蕭不滿簪強扶衰病著朝衫寒廳靜似阿闍若佳
客少于優鉢曇詩酒放懷窮亦樂文移肆罵老難堪棄官
若遂飄然計不死揚州死劔南韻況詩云人生只合揚州死而余嘗有歸蜀之意

倚欄

閒岸紗巾小倚欄吳中三月尚春寒蜂脾蜜滿花初過燕
翥泥新雨未乾老厭簿書息屏迹病逢節物強追歡一樽
又動流年感城上斜陽四角殘

晚春園中作

少逢春歸未解悲千篇曾賦傷春詩可堪霜點鬢髮後更
值綠暗園林時楊花輕墮簷外影杏子重壓關邊枝毬場
立馬漏聲靜綺窗語燕簷陰移向來春事渺何許長空鳥
跡何由追鞦韆未拆已寂寞日暮東風吹綠旗

九月初郊行

九月吳中尚袂衣江郊策馬踏斜暉
蒿花漫漫連山路豆筴離離映版扉
蒼兔避鷹投磔去黃鶴脫網傷人飛
農家光景關心事不爲無才也合歸

寄題朱元晦武夷精舍

先生結屋綠巖邊讀易懸知屢絕編
不用采芝驚世俗恐人誦道是神仙

蟬蛻巖間果是無世人妄想可憐渠
有方爲子換凡骨來讀晦菴新著書

身閒剝覺溪山好心靜尤知日月長
天下蒼生未蘇息憂公遂與世相忘

齊民本自樂衡門水旱那知不自存
聖主憂勤常旰食願

公一一報曾孫

山如嵩少三十六水似邛笮九折途
我老正須閒處著白雲一半宵分無

秋郊有懷

檐頭買雙兔市店取斗酒還家埽北窗
歡言酌親友家貧氣未餒禮薄情更厚
高唸金石裂健筆龍蛇走酒闌起出門孤
月挂衰柳大笑各散歸吾輩可不朽官身
縛簡書此樂寧復有悵望秦稽雲憑高一搔首

楚人固多孱妄謂秋可悲寧知河嶽間
氣俗樂此時壯士鳴雕弓健馬嚼枯筭
日馳三百里榆關赴戰期陣雲壓龍庭
殺氣搖參旗熾火燎狐兔倒瀉黃金卮
勒銘燕然石千載鎮兒安能空山裏
東研哦清詩

秋山瘦益奇秋水淺可涉出城西風勁拂帽吹脫葉新霜
拆栗罅宿雨飽豆莢枯柳無鳴蜩寒花有穿蝶郊行得幽
曠頗覺耳目愜斷雲北山來欣然與之接挂冠易事爾看
鏡歎勛業永懷桑乾河夜渡擁馬鬣

地僻

地僻天教養散材流年況著鬢毛催青山自繞孤城去画
角常隨晚照來几淨雙鈎摹古帖甕香小啜試新醅棗棧
不是星躔遠無奈先生興盡回

冬夜聞角聲

嫋嫋清笳入雪雲白頭老守臥中軍自憐到老懷遺恨不
向居延塞外聞
憶在梁州夜雪深落梅聲裏玉關心山城老去功名忤卧

對寒燈淚滿襟

荊州歌

楚江鱗鱗綠如釀銜尾江邊繫朱舫東征打鼓挂高帆西
上湯豬聯百丈伏波古廟占好風武昌白帝在眼中倚樓
女兒笑迎客清歌未盡千觴空沙頭巷陌三千家煙雨冥
冥開橘花峽人住多楚人少土鎬爭響茱萸茶

芳草曲

蜀山遠處逢孤驛缺甃頽垣芳草碧家在江南妻子病離
鄉半歲無消息長安城門西路去細靄斜陽芳草萋萋前
一曲渭城歌馬蹄萬里交河戍人生誤計覓封侯芳草愁
人春復秋只願東行至滄海路窮草斷始無愁

夢回

病骨便衾暖羈懷怯夢回鐘殘燈燼落香令
來老抱憂時志任非濟世材明朝入冬假燒兔薦新醅

到巖十五晦朔郡釀不佳求於都下既不時至欲借

書讀之而寓公多祕不肖出無以度日殊惘惘也

桐君放隱兩經秋小院孤燈夜夜愁名酒過於求趙壁異
書渾似借荊州溪山勝處真難到風月佳時事不休安得
連車載郢釀金鞭重作浣花遊

春殘

老墮空山裏春殘白日長庸醫司性命俗子議文章燭映
一池墨風飄半篆香箇中有佳處袖手看人忙

三月二十日晚酌

暫因賜沐作閒身太息纔餘一日春委地落花新著雨

簾歸燕不生人衛青此日怪長揖王翰當年謀卜鄰商略

晚窗須小醉朱櫻青杏正嘗新

北窗閒詠

陰陰綠樹雨餘香半捲疎簾置一牀得祿僅償賒酒券思
歸新草乞祠章古琴百衲彈清散名帖雙鈎榻硬黃夜出
灞亭雖跌宕也勝歸作老馮唐

夜出偏門還三山

月行南斗邊人歸西郊路水風吹葛衣草露滋
芒屨歌起遠汀鬼火出破墓淒涼醒醉魂荒怪入詩
半佇立叩蓬戶穉子猶讀書一笑慰遲暮

四鼓酒醒起步庭下

酒解夜過半出門步中庭天高河漢白月淡煙霧
可重滴

竹杪露疎見樹鏤星壤
瑟啼寒蛩深竹明孤螢
秋晚雖未霜蠹葉時自零
四序逝不留慨然感頽齡
平生茆一把不博帶萬釘
鷓鴣溝謝拍拍鴻路追冥冥

雲門感舊

總角來遊老未忘
背人歲月去堂堂
穉松看到偃霜蓋
廢寺憶曾開寶坊
佛几古燈寒焰短
齋厨新粟午炊香
與關未忍登車去
更倚溪橋立夕陽

行在春晚有懷古隱

老辱明時乞一官
逢春惆悵獨無歡
舊人零落北音少
市肆蕭疎民力殫
歸計已栽千箇竹
殘年合挂兩梁冠
石帆山路頻回首
箭茁蓴絲正滿槃

次韻和楊伯子主簿見贈

齋戒叩頭賤天公
幸矣使我爲枯蓬
枯蓬於世百無用
始得曠快棄秋風
此生安往失貧賤
白髮蕭蕭對黃卷
今人雖鄰有不覲
古人却向書中見
後啼月落青山空
舊隱夢寂息東蒙
不願峨冠赤墀下
且可短劔紅塵中
終年無人問良苦
眼望青天惟自許
可憐對酒不敢豪
它日空燒墳上土
文章最忌百家衣
火龍黼黻世不知
誰能養氣塞天地
吐出自足成虹霓
渡江諸賢骨已朽
老夫亦將正丘首
杜郎苦瘦帽擲耳
程子久貧衣露肘
君復作意尋齊盟
豈知衰懦畏後生
大篇一讀我起立
喜君得法從家庭
鯢鵬自有天池著
誰謂太狂須束縛
大機大用君已傳
那遣老夫安注脚

夫安注脚

杜典伯高程有巖文若皆近以詩文得名于南公而尤與子善

醉中作行草數紙

還家痛飲洗塵土醉帖淋漓寄豪舉石池墨瀋如海寬
雲下垂黑蛟舞太陰鬼神挾風雨夜半馬陵飛萬弩堂堂
筆陣從天下氣壓唐人折釵股丈夫本意陋千古
足膏礎 · 書馳報兒 直用毛錐驚殺汝

記夢

夢裏都忘兩鬢殘恍然白紵入長安
硯教紙熟脩溫卷僦得驢騎候熱官
紅葉滿街秋著句青樓燒燭夜追歡
如今萬事消除盡老眼摩挲靜處看

野興

紅飯青蔬美莫加鄰翁能共一甌茶
舍西日紫花房斂港北風生柳脚斜
筇杖不妨閒有伴茆簷終勝老無家
自驚七十猶強健采藥歸來見暮鴉

重午

葉底榴花蹙絳繪街頭初賣苑池水
會稽不藏水賣 世間各自有時節
蕭艾著冠稱道陵

梅雨

沐罷斜簪二十冠斷雲殘靄暗江干
絲絲梅子熟時雨漠漠棟花開後寒
剝采芸香辟書蠹旋春麥麩續家餐
日長倦睫惟思閉茗椀真須抵死寬

醉歌

讀書三萬卷仕宦皆束閣學劍四十年
木血未染鏑不得爲長虹萬丈掃寥廓
又不爲疾風六月送飛電戰馬死槽
櫪公卿守和約窮邊指淮淝翼域視京雒
於乎此何心有酒吾忍酌平生爲衣食
斂版靴兩脚心雖了是非口不給

唯諾如今老且病，鬢禿牙齒落。仰天少吐氣，餓死實差樂。壯心埋不朽，千載猶可作。

蝸廬

小葺蝸廬便著家，槿籬莎徑任欹斜。為生草草僧行脚，到處悠悠客泛槎。孤蝶惜衣晴曝粉，穉蜂貪蜜晚爭花。有書嬾讀吾堪愧，睡起何妨自啜茶。

故山

功名莫苦怨天慳，一櫂歸來到歎閒。傍水無家無好竹，卷簾是處是青山。滿籃箭茁瑤簪白，壓擔稜梅鶴頂殷。野興盡時尤可樂，小江烟雨趁潮還。鏡湖

禹祠行樂盛年年，繡轂爭先卷画船。十里烟波明月夜，萬人歌吹早春天。天花如上苑常成市，酒似新豐不直錢。老子未須悲白髮，黃公壚下且閒眠。禹廟

老尉鴻飛隱市門，千年猶有舊巢痕。陸生於此寓棋局，予

十年前曾丈時來開酒樽。曾丈謂文清公渺渺帆檣遙見海，冥冥

蒲葦不知村。數僧也復投詩社，零落今無一二存。梅山

落礫泉奔鑿玉虹，護丹松老卧蒼龍。霜柑籬角寒初熟，野

碓雲邊夜自春。挈榼人沽村市酒，打包僧趁寺樓鐘。幽尋

自是年來嬾枉道，山靈不見容。雲門

冬晚山房書事

山澤何妨老太平，巉巖骨相本來清。月明滿地看梅影，露

下隔溪聞鶴聲。未辨藥苗逢客問，欲酬琴價約僧評。奴

仁祖今俱絕，且學湘纍拾菊英。

屏迹山村病日增，烏皮几穩得閒凭。凍雲傍水封梅萼，嫩

雪

初

日烘窗釋硯冰歲盡光陰饒袞袞身閒醉夢且騰騰
采藥歸來晚客至從噴喚不應

春雨絕句

怡喜西窗晚照明虛簷又報雨來聲端憂不用占龜兆壞
盡花時自解晴

千點猩紅蜀海棠誰憐雨裏作啼粧殺風景處君知否正
伴鄰翁救麥忙

天公似欲敗蚕麩雨冒南山莫不收駭女癡兒那念此貪
看科斗滿清溝

今年春半不知春飛電奔雷嚇殺人縫得春衫元未著免
教惆悵洛陽塵

梅中最晚是細梅一日來看欲百回俗紫凡紅終避舍不

妨自向雨中開

蕭條冬令侵春晚浙瀝寒聲滴夜長更事老翁頑到底每
言宜睡好燒香

山園

買得新園近釣磯旋營茆棟設柴扉山經宿雨脩容出花
倚和風作態飛世事只成驚老眼酒徒頻約典春衣狂吟
爛醉君無笑十丈愁城要解圍

東關

路入東關物象奇角巾老子曳筇枝蠶如黑蟻桑生後袂
似青鍼水滯時穿市不嫌微雨溼過谿翻喜壞橋危當年
野店題詩處又典春衣具午炊
雲蹙魚鱗襯夕陽放翁繫纜水雲鄉一筇疾步人驚健斗

酒高歌自笑狂風喚市樓吹絮雪蚕生村舍采桑黃東阡
南陌無窮樂底事隨人作許忙

宿野人家

避雨來投白版扉野人憐客不相違林喧鳥雀棲初定村
近牛羊暮自歸土釜暖湯先濯足豆蕪吹火旋烘衣老來
世路渾諳盡露宿風餐未覺非

北窗

北窗本意傲羲皇老返園廬味更長犢健戴星耕白水蚕
飢衝雨采青桑但儒朱墨開冬學廟史牲牢祝歲穰從此
鬢毛雖似雪未妨擊壤頌虞唐

晚春感事

風惡房櫳燕子歸雨多山路蕨芽肥青糝旋擣作寒食白

葛預裁充暑衣穉子日長供課早故人官達寄書歸
自喜渾無事又向湖陰坐釣磯

徙倚闌干送落暉年華冉冉恨依依護雛燕子常更出著
雨楊花又嬾飛已爲讀書悲眼力還因攬帶歎腰圍親朋
半作荒郊冢欲話初心淚滿衣

示兒

舍東已種百本桑舍西仍築百步塘早茶采盡晚茶出小
麥方秀大麥黃老夫一飽手捫腹不復舉手號蒼蒼讀書
習氣掃未盡燈前簡牘紛朱黃吾兒從旁論治亂每使老
子喜欲狂不須飲酒徑自醉取書相和聲琅琅人生百病
有已時獨有書癖不可醫願兒力耕足衣食讀書萬卷真
何益

村居初夏

莫境難禁日月催臘醅初見拆泥開壓車麥穗黃雲卷食
葉盤聲白雨來薄飯蕨薇端可飽短衫紵葛亦新裁宦途
自古多憂畏白首爲農信樂哉

煮酒開時日正長山家隨分畜年光梅青巧配吳鹽白筍
美偏宜蜀豉香風暖緊催蚕上簇雨餘閒看稻移秧老夫
見事真成晚浪走人間兩鬢霜

天遣爲農老故鄉山園三畝鏡湖傍嫩莎經雨如秧綠小
蝶穿花似繭黃斗酒隻雞人笑樂十風五雨歲豐穰相逢
但喜桑麻長欲話窮通已兩忘

故鄉風物勝荆吳流水青山無處無列植園林多美菓飽
鉏畦壠富嘉蔬橋邊來泮剝桑芥池畔行芟縛穉菰我有

素紈如月扇會憑名手作新圖

新秋感事

江上清秋昨夜回漁扉正對荻洲開志存天下食不足節
慕古人讒愈來風際紙意那解久祭餘芻狗會堪哀蕭然
散髮聽秋雨剩領新涼入酒盃

秋思

一生書劒徧天涯兩歲秋風喜在家爛醉日傾無算酒高
眠時聽屬私蛙園林夕照明丹柿籬落初寒蔓碧花便擬
挂冠君會否耳根不復耐喧譁
半年閉戶廢登臨直自春殘病至今帳外昏燈伴孤夢簷
前寒雨滴愁心中原形勝關河在列聖憂勤德澤深遙想
遺民壘泣處大梁城闕又秋砧

秋晚思梁益舊遊

幅巾筇杖立籬門秋意蕭然欲斷魂恰似嘉陵江上路冷
雲微雨溼黃昏

憶昔西行萬里餘長亭夜夜夢歸吳如今歷盡風波惡飛
棧連雲是坦途

滄波極目江鄉恨衰草連天塞路愁三十年間行萬里不
論南北怯登樓

蔬圃

蔬圃依山脚漁扉竝水涯卧枝開野菊殘枿出秋茶病骨
知天色羈懷感物華餘年有幾許且灌邵平瓜

農家

南畝勤蓄穫西城謹蓋藏種蕎稊霽日斫荻待微霜谿碓

新春白山厨野蕪香何須北窗卧始得傲羲皇

城南上原陳翁以賣花爲業得錢悉供酒資又不能

獨飲逢人輒強與共醉辛亥九月十二日偶過其

門訪之敗屋一間妻子飢寒而此翁已大醉矣殆

隱者也爲賦一詩

君不見會稽城南賣花翁以花爲糧如蜜蠶朝賣一株紫

茸賣一枝紅屋破見青天盎中米常空賣花得錢送酒家

取酒盡時還賣花春春花開豈有極日日我醉終無涯亦

不知天子殿前宣白麻亦不知相公門前築堤沙客來與

語不能會但見醉髮覆面垂髭髻

晚飯罷小立門外有作

此心何敢慕輕肥尚媿無功飽蕨薇浦面鳥衝殘靄去柳

陰人荷一鋤歸病嗟短髮紛紛白老覺初心種種非百步
空庭著明月黃昏手自掩荆扉

觀梅至花涇高端叔解元見尋

春暎山中雲作堆放翁艇子出尋梅不須問信道傷叟但
覓梅花多處來

山家暮春

遶屋清陰合綠堤綠草纖起蚕初放食新麥已磨鎌苦筍
先調醬青梅小蘸鹽佳時幸無事酒盡更須添
行飯獨相羊扶藜過野塘晴光生蝶粉暎律變鸞吭麩美
羣兒競蚕飢小婦忙深知遊宦惡窮死勿離鄉

入雲門小憩五雲橋

穀雨初過換夾衣園林零落到薔薇鳴鳩日暝遙相應離

燕風柔漸獨飛臺省多才吾輩拙江湖久客算年歸雲門
蹋月方清絕且倚溪橋看夕霏

春晚村居雜賦絕句

作堤蜿蜿六百尺西崦東村成一家春雨乍晴桑吐葉秋
風初冷稻吹花

鵝兒草綠侵行路燕子花明照屋除處處乞漿俱得酒杖
頭何恨一錢無

一篙湖水鴨頭綠千樹桃花人面紅茆舍青帘起余意聊
將醉舞畚春風

朝書牛券拈枯筆算祭蚕神酌凍醪閒放無憂窮有意勞
人錯羨此翁高

澆書滿把浮蛆瓮攤飯橫眠夢蝶牀莫笑山翁見機晚也

勝朝市一生忙東坡先生謂晨飲為澆書李黃門謂午睡為攤飯
午枕閉門無客攪夜燈開卷有兒同若為殘與天公道盡
乞餘生向此中

雨晴

閒曳枯筇自在行曲廊小閣賞新晴幽禽葉底吟風久殘
雨枝間照日明茶映盞毫新乳上琴橫薦石細泉鳴亦知
老健終難恃且復蕭然得此生

六月十四日微雨極涼

湖上清秋近空中白日長雲來樹收影雨過土生香蓮小
紅衣溼瓜甘碧玉涼晚來幽興極移榻近方塘

水亭晚眺

暑雨初晴浦面寬水亭景物卷簾看聯舟作陣圍漁隊屈

竹成籬護芡盤四海諸公半丘壘百年幾夕倚闌干日沈
未用匆匆去待挽銀河濯肺肝

蓬萊館午憩

驛門繫馬聽蟬吟翻動平生萬里心橋畔笛聲催日落城
邊草色帶烟淡關河歷歷功名晚歲月悠悠老病侵憶戍
梁州如昨日憑闌西望一霑襟

夢遊散關渭水之間

平生望眼怯天涯客裏何堪度歲華但恨征輪無四角不
愁歸路有三義驛窗燈闇傳秋柝關樹烟深宿算鴉叱犢
老翁頭似雪羨渠生死不離家

秋夜將曉出籬門迎涼有感

迢迢天漢西南落喔喔鄰雞一再鳴壯志病來消欲盡出

門極首搶平生
三萬里河東入海五千仞嶽上摩天遺民淚盡胡虜裏南
望王師又一年

秋日郊居

秋日雷連野老家朱槃鮓鱒粲如花已炊嘉散真珠米更
點丁坑白雪茶嘉散米名丁坑茶名

今年斟酌是豐年社近兒童喜欲顛半醉半醒村老子家
家門口掠神錢

兒童冬學鬧比鄰據案愚儒却自珍授罷村書閉門睡終
年不著面看人農家十月乃遣子入學謂之冬學所讀雜
字百家姓之類謂之村書

新晴

積雨已凄冷新晴還少和稼收平野濶木落遠山多土潤

朝畦菜機鳴夜擲梭時清年歲好吾敢歎蹉跎

晚眺

秋晚閒愁抵酒濃試尋高處倚枯筇雲歸時帶雨數點木
落又添山一峰鳴雁沙邊驚客艣行僧煙際認樓鐘箇中
詩思來無盡十手傳抄畏不供

九月一日夜讀詩藁有感走筆作歌

我嘗學詩未有得殘餘未免從人乞力孱氣餒心自知妄
取虛名有慙色四十從戎駐南鄭酬宴軍中夜連日打毬
築場一千步閱馬列廐三萬疋華燈縱博聲滿樓寶釵豔
舞光照席琵琶絃急水電亂羯鼓手勻風雨疾詩家三昧
忽見前屈賈在眼元歷歷天機雲錦用在我剪裁妙處非
刀尺世間才傑固不乏秋毫未合天地隔放翁老死何足

論廣陵散絕還堪惜

小園

窄窄柴門短短籬山家隨分有園池客因問字來攜酒僧
趁分題就賦詩晨露每看花蕊拆夕陽頻見樹陰移此二事非
閒寂不
知也拂衣司諫猶忙在此趣淵明却少知

九月二十三夜小兒方讀書而油盡口占此詩示之
微骨貧來累始輕孤村月上正三更汝緣油盡眠差早我
亦尊空醉不成南陌金羈良自苦北邙麟冢半無名書生
事業期千載得喪從來未易評

今年立冬後菊方盛開小飲

胡牀移就菊花畦飲具酸寒手自攜野實似丹仍似漆村
醪如蜜復如齏傳方州解烹羊脚破戒猶慙擘蟹膾一醉

又驅黃犢出冬晴正要飽耕犁

步至近村

藥物扶持病漸平布裘絮帽出柴荆荒堤經雨多牛跡村
舍無人有碓聲數蝶弄香寒菊晚萬鴉回陣夕楓明老翁
隨意閒成句不似劉侯要取名

夜讀范至能攬轡錄言中原父老見使者多揮涕感

其事作絕句

公卿有黨排宗澤帷幄無人用岳飛遺老不應知此恨亦
逢漢節解沾衣

書適

老翁垂七十其實似童兒山果啼呼覓鄉灘喜笑隨羣嬉
累瓦墻獨立照盆池更挾殘書讀渾如上學時

十一月四日風雨大作

僵臥孤村不自哀尚思為國戍輪臺夜闌卧聽風吹雨鐵馬冰河入夢來

病起

少年射虎南山下惡馬強弓看似無老病即今那可說出
門十步要人扶

書巢冬夜待旦

掃葉擁階寒犬行編茆護柵老鷄鳴風霜漸逼歲時晚形
影相依燈火明史策千年媿豪傑關河萬里愴功名固應
死抱無窮恨老病何由更請纓

冬晴閒步東村由故塘還舍作

紅藤拄杖獨相羊路遠東村小嶺傍水落枯萍粘蟹殼人

植竹以取蟹謂之蟹假

雲開寒日上漁梁洛陽二頃言良是光範三

書計本狂歷盡危機識天意要令閒健反耕桑

寄宇文成州

成州太守比何如夢裏依然把臂初復起卿當用卿法長
閒吾實愛吾廬五湖風雨孤舟去萬里關山一紙書正使
兩翁長隔濶子孫它日莫相疎

春雨

午夜聽春雨發生端及期世憂殊未艾天意固難知士節
承平日人材南渡時後生聞見狹撫枕歎吾衰

僧廬

僧廬土木塗金碧四出徵求如羽檄富商豪吏多厚積宜
其棄金如瓦礫貧民妻子半菽食一飢轉作溝中瘠賦斂

鞭笞縣庭赤持以與僧亦不惜古者養民如養兒勸相農
事憂其飢露臺百金止不為尚媿七月周公詩流俗紛紛
豈知此熟視創殘謂當爾傑屋大像無時止安得疲民免
飢死

贈劉改之秀才

君居古荊州醉膽天宇小尚不拜龐公况肯依劉表胸中
九淵蛟龍蟠筆底六月冰雹寒有時大叫脫烏幘不怕酒
盃如海寬放翁七十病欲死相逢尚能刮眼君李廣不生
楚漢開封侯萬戶宜其難

春社

太平處處是優場社日兒童喜欲狂且看參軍喚蒼鶻京
都新禁舞臺郎

村夜

寂寂山村夜悠然醉倚門月昏天有暈風軟水無痕迹為
遭譏遠身由不仕尊敢嗟車馬絕同社自鷄豚

困甚戲書

官如枝頭乾不受雨露恩身如水上浮泛泛寧有根刈茆
以苦屋縛柴以為門故人分祿米隣父餉魚殮前門吏徵
租後門質襦裙不敢謀歲月且復支朝昏雨餘幽花拆亦
可侑清尊吾生信已乎終老此山村

戲詠山陰風物

萬里秦吳稅駕蓬還鄉已嘆鬢成絲城邊綠樹山陰道水
際朱扉夏禹祠項里楊梅鹽可徹太白梁國吟云玉盤楊
梅為君設吳鹽如花皎
薦以鹽佳品未嘗用也白雪不知楊梅酸者乃湘湖蓴菜鼓偏宜蓴菜最宜鹽鼓
所謂未下鹽鼓

者言下鹽鼓則非羊酪可敵蓋盛言尊美之美爾圖經草草尚堪恨好事它年采此詩

癸丑七月二十七日夜夢遊華嶽廟

驛樹秋風急關城暮角悲平生忠憤意來拜華山祠
牲碑僞正朔祠祝衣冠神亦豈堪此出門山雨寒

僕頃在征西大幕登高望關輔樂之每冀王師拓定

得卜居焉暇日記此意以示子孫

八月殘暑退秋聲滿庭樹豈無四方志衰病迫霜露

稔惡天震怒南北會當一老吾悲不遇子孫勉西

遷俗厚吾所慕約已收孤嫠教子立門戶黍稌暗阡陌
雉足七箸永為河渭民勿憚關山路

秋夜感舊十二韻

冷螢綴蓬根忽復照高樹年光逝不留百感集遲暮往者

秦蜀間慷慨事征戍猿啼鬼迷店馬噤飛石舖鬼迷店在

飛石舖在小益道中常有崩石危嶺高入雲朽棧劣容步天近星宿大江

惡蛟鼉怒意氣頗自奇性命那復顧最懷清渭上衝雪夜

掠度封侯細事爾所冀垂竹素兜鍪竟何成豈獨儒冠誤

當時妄按尉旗纛今照路浩歌遂成章聊慰老不遇

秋晚閒步隣曲以予近嘗卧病皆欣然迎勞

放翁病起出門行績女窺籬牧豎迎酒似粥釀知社到鄰

如盤大喜秋成歸來早覺人情好對此彌將世事輕紅樹

青山只如昨長安拜免幾公卿

雨夜

歲晚茆茨劣自容齒搖將脫髮將童心遊萬里關河外身

食南言金 五十五
卧一窗風雨中醫不可招惟忍病書猶能讀足忘窮夜關
睡覺蛩聲裏時見燈花落碎紅

夢至洛中觀牡丹繁麗溢目覺而有賦

兩京初駕小羊車顛顛江湖歲月賒老去已忘天下事夢
中猶看洛陽花妖魂豔骨千年在朱彈金鞭一笑譁寄語
裘莫癡絕祈連還汝舊風沙

秋夜獨酌

壯志隨年減羈愁與夜長月高寒暈淡花坼露釵香仕艮
讒銷骨歸判酒腐腸青燈寫孤影相勸盡餘觴

自嘲

歲月推遷萬事非放翁可是白頭癡此生意出古人下有
志尚如年少時僻學固應知者少長歌莫問和予誰自嘲

自解君毋怪老大從人百不宜

數日秋氣已深清坐無酒戲題長句

漸近重陽天氣嘉數椽茆竹淡生涯山童擁篲埽黃葉鄰
女傷籬收碧花避俗要生輪四角出門何啻路三义晚窗
酒盡無多歎試問前村好事家

東村散步有懷張漢州

扶杖村東路秋來始此回寒鴉盤陣起野菊卧枝開憂國
丹心折懷人雪鬢催房湖八千里那得尺書來

排悶

四十從軍渭水邊功名無命氣猶全白頭爛醉東吳市自
拔長劒割篋肩

西塞山前吹笛聲曲終已過雜陽城君能洗盡世間念何

處樓臺無月明

放歌行

君不見汾陽富貴近古無二十四考書中書又不見慈明
起自布衣中九十五日至三公人生窮達各有命拂衣徑
去猶差勝介推焚死終不悔梁鴻寄食吾何病安用隨牒
東復西獻諛耐辱希階梯初無公論判涇渭徒使新貴矜
雲泥稽山一老貧無食衣破履穿面黧黑誰知快意舉世
無南山之南北山北

山頭石

秋風萬木賈春雨百草生造物初何心時至自枯榮惟有
山頭石歲月浩莫測不知四時運常帶太古色老翁一生
居此山脚力欲盡猶躋攀時時撫石三歎息安得此身如

爾頌

野興

老去癡頑百不能非醒非醉日騰騰敲門惟有徵租吏好
事元無送米僧舊俗不還誰復念古書雖在漸難憑平生
意氣今如此惆悵西窗半夜燈

古築城曲

築城聲酸嘶漢月傷城低白骨若不掩高與長城齊
嶧山訪秦碑斷裂無完筆惟有築城詞哀怨如當日

山園

山泉引派漲清池野蔓移根種短籬藝果極知非老事接
花聊復効兒嬉提壺言語開顏聽斲木衣襦緩步窺莫笑
題詩還滿紙小園幽事要君知

古別離

孤城窮巷秋寂寂美人停梭夜歎息空園露溼荆棘枝荒
溪月照狐狸迹憶君去時兒在腹走如黃犢爺未識紫姑
吉語元無據况憑瓦兆占歸日嫁來不省出門前魂夢何
因識酒泉粉綿磨鏡不忍照女子盛時無十年

病起山居日有幽事戲作

鶴骨龜腸欲不禁扶衰初喜罷呻吟益山水釋書窗暝藥
竈香濃道院滾筆健乍臨新獲帖手生重理舊傳琴閉門
局促還堪恨雲海何時豁此心

水村曲

山村今年晚禾旱奏下民租蠲大半水村雨足米狼戾也
放三分慰民意看榜歸來迭歌舞共喜清平好官府老翁

猶記軍興時汝輩少年那得知

賽神曲

擊鼓坎坎吹笙鳴鳴綠袍槐簡立老巫紅衫繡裙舞小姑
烏臼燭明蠟不如鯉魚糝美出神厨七玉前致詞小姑抱
酒壺願神來享常懽娛使我嘉穀收連車牛羊莫歸塞門
閭鷄驚一母生百雛歲歲賜粟年年蠲租蒲鞭不施園土
空虛束草作官但形模刻木爲吏無文書淳風復還羲皇
初繩亦不結况其餘神歸人散醉相扶夜溪歌舞官道隅

涼州行

涼州四面皆沙磧風吹沙平馬無迹東門供張接中使萬
里朱宣布襖勅勅中墨色如未乾君王心念兒郎寒當街
謝恩拜舞罷萬歲聲上黃雲端安西北庭皆仰縣四朝

蘇東坡詩集
五十一
貢無征戰舊時

陷關中五丈原頭作邊面

七十

七十殘年百念枯
桑榆元不補東隅
但存隱具金鴉嘴
那夢朝衣玉鹿盧
身世蚤眠將作繭
形容牛老已垂胡
客來莫問先生處
不釣娥江卽鏡湖

正月二十日晨起弄筆

淡院窗扉曉色遲
新愁宿醉兩參差
雨聲欲與夢相入
春意不隨人共衰
零落殘梅臨小約
縱橫野水赴清池
物華撩我緣何事
似恐新年漸廢詩

新闢小園

西成歸來鬢已霜
生兒又過乃翁長
眼明身健殘年足
飯軟茶甘萬事忘
學廢僅能書姓字
客來懶復倒衣裳
山園寂寂春將晚
酷愛幽花似蜜香

新展山園半畝強
笑入車馬出籠坊
山禽乍暖慙慙語
野蘓無風自在香
點點水紋迎細雨
疎疎籬影界斜陽
出門遙向隣翁說
釋耒相從共一觴

久不得張漢州書

儘道三巴遠
邠無一紙書
衰遲自難記
不是故人疎

春晚村居

一事元無可得忙
悠然半醉倚胡牀
牡丹枝上青春老
燕子聲中白日長
身世已如風六鷁
文章仍似閨黃楊
太平有象無人識
南陌東阡擣麩香

遊雲山諸蘭若

花過木陰合
溪雲生
暮涼牛行響
白水鷺下點
青秧古寺

宛如管釋松森已行道衛松及二十年則僧輒伐去復種
香年不下榻童子為燒香

園中小飲

此老胸中萬頃寬小園幽徑日追歡寧教西日尋常債取
就人求本分官高柳陰濃煙欲暝叢花紅溼露初溥時月
盛要知澤國年光晚已過清明尚淺寒

鳥啼

野人無曆日鳥啼知四時二月開子規春畊不可遲三月
聞黃鸝幼婦閑蚕飢四月鳴布穀家家蚕上簇五月鳴鴉
舅苗稚憂草茂人言農家苦望晴復望雨樂處誰得知生
不識官府葛衫麥飯有卽休湖橋小市酒如油夜夜扶歸
常爛醉不怕行逢灞陵尉

題陽關圖

誰畫陽關贈別詩斷腸如在渭橋時荒城孤驛夢千里遠
水斜陽天四垂青史功名常蹭蹬白頭襟抱足乖離山河
未復胡塵暗一寸孤愁只自知

夜分不寐起坐園中至旦

涼氣蘇衰疾幽情入杖藜月驚孤鵲起天帶衆星西松菊
今彭澤山川古會稽清吟殊未愜嗟嗟已晨鷄

醉睡初覺偶作

小圃醒還醉幽窗起復眠虛明炷香地清潤斲花天老去
才雖盡窮來志益堅阿瞞那可語平日笑橋玄

閒中

閒中高趣傲羲皇身卧維摩示病牀活眼硯凹宜墨色長

毫甌小聚茶香門無客至惟風月宋有書存但老莊問我
東歸今幾日坐看庭樹六番黃

悶極有作

貴已不如賤狂應又勝癡新寒壓酒夜微雨種花時堂下
藤成架門邊枳作籬老人無日課有興卽題詩

三峽歌

乾道庚寅予始入蜀上下三峽屢矣後二十五年歸咼
山陰偶讀梁簡文巴東三峽歌感之擬作九首實紹熙

甲寅十月二日也

神女廟前秋月明黃牛峽裏茸猿聲危途性命不容恤百
丈牽船侵夜行

不怕難如竹節稠新灘已過可無憂古粧峩峩一尺髻木

益銀盃邀客舟

十二巫山見九峰船頭彩翠滿秋空朝雲暮雨渾虛語一
夜猿啼明月中

錦繡樓前看賣花麝香山下摘新茶長安卿相多憂畏老
向夔州不用嗟

險詐沾沾不媿天交情回首薄如烟東遊萬里雖堪樂灩
澦瞿塘要放船

蠻江水碧瘴花紅白舫黃旗無便風涪萬四時常避水棚
居高出亂雲中

亂插山花簪子紅蠻歌相和響西東忽然四散不知處踏
月捫蘿歸洞中

萬州溪西花柳多四鄰相應竹枝歌問君今夕不痛飲奈

此滿川明月何

我游南賓春暮時蜀船曾繫挂猿枝雲迷江岸屈原墻花
落空山夏禹祠

書室明煖終日婆娑其間倦則扶杖至小園戲作長

句

美睡宜人勝按摩江南十月氣猶和重簾不捲畱香久古
硯微凹聚墨多月上忽看梅影出風高時送鴈聲過一杯
太淡君休笑牛背吾方扣角歌

初冬

老客人間百事慵樂哉閉戶過今冬朝爐獸炭騰紅焰夜
榻蠻氊擁紫茸蝟刺圻蓬新粟熟鷄雛弄色凍醅濃題詩
正自消閒日本不爭先萬戶封

幽居

雨霽雞棲早風高雁陣斜園丁刈霜稻村女賣秋茶缺井
磨樵斧枯桑繫釣槎客來那用問此是放翁家

冬夜獨酌

寒水茫茫浸月明疎鐘杳杳帶霜清一樽濁酒有妙理十
里荒鷄非惡聲物外雖增新跌宕胸中未洗舊崢嶸頽然
坐睡蒲團穩殘火昏燈伴五更

雜詠園中菓子

不酸金橘種初成無核枇杷接亦生珍產已從幽圃得濁
醪仍就小槽傾

槩石榴隨糕作節蠟櫻桃與酪同時兩株偶向池邊種可
喜今年墜折枝

架垂馬乳收論斛港種雞頭采滿船
龜鼎若爲占食指麩車未用墮饒涎

山杏谿桃本看花纍纍成實亦堪誇
監收蜜漬饒風味送與山僧下夜茶

歲暮感懷

家世本無年甲子近一周小子獨何幸
七十今平頭往者收朝迹亟欲求歸休
厚恩許奉祠得祿歲愈憂三釜不及親
顧爲妻子畱何由洗此媿欲挽天河流

高皇昔中興風雨躬沐櫛一士未嘗遺
萬里皆馳日廉聽關言路虛懷詢得失
孤臣實艸芥亦獲對宣室龍顏宛在目
德不報萬一橋出松栢寒淚盡史臣筆

王師宿梁益行臺護諸將腐儒添辟書
萬里至渭上旌旗

照關路風雪暗戎帳堂堂鐵馬陣疊疊
木牛餉誰知骨相薄空負心膽壯回首
二十年撫事增悲愴

在晉祖宗時風俗極粹美人材兼南北
議論忘彼此誰令各植黨更仆而迭起
中更既此風猶未已臣不難負君生者
固賣死儻築太平基請自厚俗始

井地以養民整整若碁画初無甚貧富
家有五畝宅哀哉古益遠禍始開阡陌
富豪役千奴貧老無寸帛困窮禮義廢
盜賊起促迫誰能講古制毒我太平脉

贈應秀才

過宋不見元城公渡淮不見陳了翁
當時人人皆太息至今海內傾高風
老夫七十居鄉縣龔礙龍鍾何足見
辱君雪裏來叩門自說辛勤求識面
我得茶山一轉語文章切

忘參死句知君此外無他求有求寧踏三山路

山園雜詠

祠祿留人未挂冠山園三畝著身寬百年竟向愁邊老萬
事元輸靜處看花徑糝紅供晚醉月天生暈作春寒汗青
事業都忘盡時賴吾兒舉話端

殘春終日在林亭散髮披衣醉復醒科斗已成鼃閣閣櫻
桃初結子青青魚遊滄海寧濡沫禽慕雕籠即翦翎薄晚
東風吹小雨笑攜長鏡伴畦丁

春晚懷山南

梨花堆雪柳吹絲常記梁州古驛前二十四年成昨夢每
逢春晚即悽然
壯歲從戎不憶家梁州裘馬鬪豪華至今夜夜尋春夢猶

在吳園藉落花

身寄江湖兩鬢霜金鞭朱彈夢猶狂遙知南鄭城西路月
與梨花共斷腸

春晚雜興

澤國固多雨暮春猶薄寒兒童茸茶舍婦女賽蚕官閱世
年雖往為農興未闕窮途得一飽亦足慰艱難

池面萍初紫牆頭杏已青攜兒撐小艇畱客坐孤亭相浚
無侯骨生平直酒星正須遺萬事莫遺片時醒

小市湖橋北幽居石埭西蒲深姑惡哭樹密姊歸啼山茗
封青箬村醅坵赤泥平生汗簡手投老慣扶犁

病瘍無意緒閉戶作生涯草草半盂飯悠悠一盃茶笑穿
居士屨閒看女郎花

唐人謂辛夷為女郎花園中有此花一叢二百朵莫問明朝

事忘家即出家

齋中雜題

列屋娥眉不足誇可齋別自是生涯閒將西蜀開窠錦自
背南唐落墨花
裴几硯涵鸚鵡眼古奩香斲鷓鴣斑絕知造物慇懃意成
就衰翁到死閒

上巳書事

單衣初著下湖天飛蓋相隨出郭船得雨人人喜秧信祈
蠶戶戶斂神錢黃鷄煮臠無停筋青韭淹菹欲墮涎丞相
傳聞又三押衡茅未改日高眠

春夏之交風日清美欣然有賦

芳潤園林不似貧年光無盡逐番新來禽顏色不禁雨搏
黍語言如惜春身外豈關吾輩事鏡中已換昔時人神僊
定未超塵俗猶插金貂侍帝晨

初夏行平水道中

老去人間樂事稀一年容易又春歸市橋壓擔蓴絲滑村
店堆盤豆莢肥傍水風林鶯語語滿園煙草蝶飛飛郊行
已覺侵微暑小立桐陰換夾衣

幽棲

閒人了無事地僻稱幽棲啣米畱鷄食移琴避燕泥桐生
窗欲暗筍長徑還迷不作客車計門闥儘放低

誰謂幽棲陋茅茨足庇牀雨便梧葉大風度練花香浴佛
兒童喜繅絲婦女忙搗來三十載吾鬢固宜霜

乾道丙戌始卜居鏡

湖之三山今
甫三十年矣

十月十七日子生日也孤村風雨蕭然偶得二絕句
予生淮上是日平旦大風雨駭人及予墮地雨乃
止

少傅奉詔朝京師棹船生我淮之湄宣和七年冬十月猶
是中原無事時

我生急雨暗淮天出沒蛟鼉浪入船白首功名無尺寸茅
簷還聽雨聲眠

枕上偶成

放臣不復望脩門身寄江頭黃葉村酒渴喜聞疎雨滴夢
回愁對一燈昏河潼形勝寧終棄周漢規模要細論自恨
不如雲際雁南來猶得過中原

舍北明望作六字絕句

潘岳一篇秋興李成八幅寒林舍北偶然倚杖盡見古人
用心

題菴壁

身似蝸牛麤有廬却緣無用得安居地爐封火欺寒雨紙
閣油窗見細書麴熟山僧分餽飴船來溪友餉薪樗閉門
莫笑衰頽甚讀易論詩亦未疎

貧甚作短歌排悶

閒何濶逢諸葛畏人常憂不得活事不諧問文開不蹋權
門更可哀卽今白髮如霜艸一飽茫然身已老惟有躬耕
差可爲賣劍買牛悔不早年豐米賤身獨饑今朝得米無
薪炊地上去天八萬里空自呼天天豈知

雨夜有懷張季長少卿

放翁雖老未忘情獨卧山村每自驚鼎鼎百年如電速寥寥一笑抵河清梅初破藟行江路燈欲成花聽雨聲正用此時息劇飲故交零落愴餘生

春思

七丁老翁身退耕可憐未減舊風情典衣取酒那論價秉燭看花每到明江浦時時逢兩樾寺樓處處聽新鶯此生無復陽關夢不怕樽前唱渭城

丙辰上元前一日

弊裘破帽髮鬢髻宛似山房罷講僧身病不禁連夜雨家貧只挂去年燈修椽柳外掀樓角危檻雲間露塔層自笑閒遊本無定興闌隨處倚枯藤

懷舊

狼煙不舉羽書稀幙府相從日打圍最憶定軍山下路亂

飄紅葉滿戎衣

翠崖紅棧鬱參差小益初程景最奇誰向豪端收拾得李將軍画少陵詩

幽居初夏

湖山勝處放翁家槐柳陰中野徑斜水滿有時觀下鷺艸淡無處不鳴蛙籜龍已過頭番筍木筆猶開第一花歎息老來交舊盡睡餘誰共午甌茶

六月二十四日夜分夢范至能李知幾尤延之同集

江亭諸公請予賦詩記江湖之樂詩成而覺忘數字而已

露箬霜筠織短篷飄然來往淡煙中偶經菱市尋谿友却

棟簷汀下釣筒白菡荷香初過雨紅蜻蜓弱不禁風吳中
近事君知否團扇家家畫放翁

閒居自述

自許山翁嬾是真紛紛外物豈關身花如解笑還多事石
不能言最可人淨掃明窗憑素几閒穿密竹岸島巾殘年
自有青天管便是無錐也未貧

秋雨初霽試筆

墨入紅絲點漆濃閒將倦筆寫秋容雨聲已斷時聞滴雲
氣將歸別起峰斜日半穿臨水竹好風遙送隔城鐘遠遊
更動輕舟興太息何人解見從

舍北搖落景物殊佳偶作

路擁新霜葉溪餘舊漲沙栖鳥初滿樹歸鴨各知家世事

元堪笑吾生固有涯南村聞酒熟試遣小童賒

屋角成金字溪流作縠紋斜通小橋路半掩夕陽門孤艇
衝煙過疎鐘隔塢聞杜門非獨病實自厭紛紛

艸徑人稀到柴扉手自開林疎鴉小泊溪淺鷺頻來簷角
除瓜蔓牆隅斲芋魁東鄰膳肉至一笑舉新醅

醉中信筆作四絕句既成懼觀者不知野人本心也

復作一絕

麥野桑村有酒徒過門相覓醉相扶朱門日日教歌舞也
有農家此樂無

過得一日過一日人間萬事不須謀鄰家幸可賒芳醞紅
藥何曾笑白頭

今朝賣穀得青錢自出街頭買蕤肩艸火燎來香滿屋未

容下筋已流涎
老病人間足畏途
怕人渾似怕於菟
晴明頗動青鞵興
先探門前有客無
治道巍巍本易成
狂言安得略施行
太平事業人皆見
不計封倫死與生

睡起至園中

春風忽已遍天涯
老子猶能領物華
淺碧細傾家釀酒
小紅初試手栽花
野人易與輸肝肺
俗語誰能挂齒牙
更欲世間同省事
勾回蟻戰放蜂衙

雨中作

三日雨頻作
昏昏饒睡眠
泥塗散酒市
風惡惱燈天
茆屋松明照
茶縑雪水煎
山家自成趣
撫枕寄悠然

短髮白如絲
梅花似舊時
掩屏愁入夢
隱几雨催詩
病爲陰天劇
春綠閨歲遲
非關畏車馬
衰甚實難支

立春日

花壓烏巾酒滿卮
舊逢春日恨春遲
如今病卧孤村裏
過了新春也不知

春行

九日春陰一日晴
強扶衰病此閒行
猩紅帶露海棠溼
鴨綠平堤湖水明
杜子美曉看紅溼處
花重錦官城
李太白蜀江紅日明
用溼字明字可謂奪造化之功
世未有指出者
酒賤柳陰逢醉卧
土肥稻壟看淡耕
山翁莫道渾無用
解與明時說太平

賞花至湖上

吾國名花天下稀
園林盡日敞朱扉
蝶穿密葉常相失
蜂

戀繁香不記歸欲過用愁風蕩漾半開却要雨霏微良辰
樂事真當勉莫遣怱怱一片飛

暮春

數間茆屋鏡湖濱萬卷藏書不救貧燕去燕來還過日花
開花落卽經春開編喜見生平友照水驚非曩歲人自笑
心尚在憑高慷慨欲忘身

七十三吟

七十三年事事新涵濡幸作六朝民髮無可白方爲老酒
不能賒始覺貧末路已悲身是客此心猶與物爲春柴門
勿謂常岑寂時有鄉鄰請藥人

舍北行飯書觸目

晚飧初潑一甌茶曳杖間行興未涯煙樹參差墨濃淡風

鴉零亂字橫斜夕陽偏傍平橋路寒蝶猶依晚菊花堪笑
衰翁耐荒寂短衣霑露未還家

春近山中卽事

節物貧家有故常春盤蠟粥逐時忙悠悠歲月催雙鬢艸
艸鷄豚薦一觴人意自殊平日樂梅花寧減故時香小園
新展西南角桂樹青蘿百尺長

雪夜感舊

江月亭前樺燭香龍門閣上馱聲長亂山古驛經三折小
市孤城宿兩當晚歲猶思事鞍馬當時那信老耕桑綠沉
金鎖俱塵委雪洒寒燈淚數行

將進酒

我欲挽住北斗杓常指蒼龍無動搖春風日夜吹艸木只

有榮盛無時凋我欲剗斷日行道陽烏當空月杲杲非惟
四海常不夜亦使人生失衰老如山積麴高崔嵬大江釀
作蒲萄醅頽然一醉三千盃借問白髮何從來

雜感

志士山棲恨不淡人知已足負初心不須先說嚴光輩直
自巢由錯到今

百年鼎鼎成何事寒暑相催卽白頭縱得金丹真不死摩
挲銅狄更添愁

山人那信宦途艱強著朝衣趁曉班豪氣不除狂態作始
知只合死空山

故舊書來訪死生時聞剝啄叩柴荆自嗟不及東家老至
死無人識姓名

幽居

小舫藤爲纜幽居竹織門短籬圍藕蕩細路入桑村魚膾
槎頭美醅傾粥面渾殘年謝軒冕猶足號黎元

夏日

過眼春光久已空曬絲擣麥又匆匆新泥滿路梅黃雨古
木號山月暈風角黍菱新聞罇俎靈符墨溼照房櫳歲華
不爲衰翁駐且付餘生一笑中
雨斷雲歸旋作晴尚餘紅濕在簾旌燕雛掠地飛無力梅
子臨池墜有聲米糲解包供午餉萍壑倚枕析朝醒此翁
不負頑軀處捫腹時時遠舍行

感舊

夢識梁州遠南山在眼邊霜郊熊撲樹雪路馬蒙羶慘淡

遺壇側

拜韓信壇至今猶存蕭條古廟壩

河陽有蜀後主所立武侯廟百詩猶可想歎息遂無傳

予山南雜詩百餘篇舟行過望雲灘墜水

夜涉南沮水朝過小益城梯山天一握度棧土微平雨近

秦雲暗霜高隴月明至今孤夢裏喝馬有遺聲

喝馬皆七字韻語聞之悲愴動人

早發金堆市更衣石櫃亭灘聲秋後壯山色雨餘青道濘

愁車轍橋危避駝鈴功名竟何在撫事感頽齡

塵土暗貂裘森然白髮稠年光真袞袞吾事竟悠悠馬宿

平沙夜

軍中馬及廐卒夏夜皆露宿沙上

烽傳絕塞秋

平安火故南山來至山南城下故

人零落盡追寫只添愁

秋夕露坐作

銀河半落露華清南斗闌干北斗明冉冉方悲老將至纖

纖又歎月初生酒牀細滴香浮瓮衣杵相聞聲滿城萬卷

讀書無用處却將耕稼報昇平

秋思

身似龐翁不出家一窗自了淡生涯山薑零落初成子石

竹淒涼半吐花寒澗挹泉供試墨墮巢篝火喚煎茶掩關

本意君知否兩耳衰年不耐譁

豐歲

豐歲驩聲動四鄰淡秋景氣粲如春羊腔酒擔爭迎婦鼉

鼓龍船共賽神處處喜晴過甲子家家築屋趁庚申老翁

欲伴鄉間醉先辦長衫紫領巾

秋賽

柳姑廟前煙出浦冉冉紫空青一縷須臾散作四山雲明

日來爲社公雨小巫屢舞大巫歌士女拜祝肩相摩芳茶
綠酒進雜選長魚大截高嵯峨常年徵科煩筮楚縣家血
涇庭前土妻啼兒號不敢怨期會常憂累官府今年家家
有餘粟縣符未下輸先足木刻吏蒲作鞭自然粟帛如流
泉儲積不愁無九年

小舟過吉澤效王右丞

澤園霜露晚孤村煙火微本去官道遠自然人迹稀木落
山盡出鐘鳴僧獨歸漁家閒似我未夕閉柴扉

太息

自古才高每恨浮偉人要是出中州卽今未必無房魏埋
沒胡沙死卽休

關輔堂堂墮虜屢渭城杜曲又逢春安知今日新豐市不

有悠然獨酌人

歲首書事

東風入律寒猶劇多稼占祥雪欲成雲陰作雪彌旬至開
歲雪意愈濃明日戊
初立春猶可
爲臘雪也鬱壘自書誇腕力屠蘇不至歎人情今歲無
者呼盧院落譁新歲
謂之試年庚賣困兒童起五更立
未明相呼賣春
田亦舊俗也白髮滿頭能且健
隨鄰曲樂昇平

菴中獨居感懷

無錢溪女亦畱魚有雨東家每借驢
熬粥數匙晨壓藥松
肪一椀夜觀書黃紬被暖閒無厭
白布衫長樂有餘南陌
東阡春事動放翁作計未全疎

春日園中作

杏花開過尚輕寒盡日無人獨倚闌
久別名山憑夢到每

金言詩金 卷之三 七十三
思舊友取書看塵埃幸已除腰折富貴處知欠面團老去
逢春都有幾一杯行復送春殘

春日小園雜賦

市塵不到放翁家繞麥穿桑野徑斜
夜雨長深三尺水曉寒畱得一分花
悶從鄰舍分春瓮閒就僧窗試露芽
自此年光應更好日驅秧馬聽鑣車

春思

兀兀治尊酒未醒霏霏潑火雨初晴
愁看入戶桃花片閒聽爭巢燕子聲
百疾侵陵成老大一春轉盼又清明
蘭亭禹廟渾如昨回首兒時似隔生

白樂天詩云倦倚繡牀愁不動
緩垂綠帶髻鬟低遼陽春盡無消息
夜合花前日又西好事者畫之爲

倦繡圖此花以五六月開山中多于茨棘人殊不

覺之爲賦小詩以寄感歎

王室東遷歲月賒兩京漠漠暗沙繡
牀倦倚人何在風雨漫山夜合花

蜉蝣行

蜉蝣至細能知時春風磴雨占無遺
蜻蜓滿空乃不知庭除一出無歸期
樂哉蜻蜓高下飛蜉蝣未盡何憂飢
簷間蜘蛛亦伺汝吐絲織網腹如鼓

村舍雜書

中春農在野蚕事亦隨作手種臨安青
桑可飼蚕百箔累累繭滿簇繹繹絲上
篋老子雖安眠衣帛可無怍
舍南種胡麻三日幸不雨晨起親按行
已見青覆土窮人

如意少喜色漏眉宇兒童勿情偷造物不負汝

五月新麪成六月甘瓜熟作麪及良時火見金始伏懸知

桑落後醅面濃如粥再拜謝天公無功叨美祿子家釀用法宛丘瓜麪

折蓮釀作醯采豆治作醬開曆揆日時汲井滌瓮盎上奉
時祭須下給春耕餉咨爾後之人歲事不可曠

東山石上茶鷹瓜初脫鞴雪落紅絲磴香動銀毫甌爽如
聞至言餘味終日留不知葉家白亦復有此不

逢人乞藥栽鬱鬱遂滿園玉芝來天姥黃精出雲門丹苗
雨後吐綠葉風中翻活人吾豈能要有此意存

軍興尚戎衣冠帶謝褒博禿巾與小襲顧影每懷作及今
反士服始覺榮天爵出入阡陌間終身有餘樂

讀書乃一癖我亦不自知坐書窮至老更欲傳吾兒吾兒
復當傳百世以為期君看北山公太行尚可移

爵祿九鼎重名義一羽輕人見其如此吾道何由行湖山
有一士無人知姓名時時風月夕遙聞清嘯聲

陳阜卿先生為兩浙轉運司考試官時秦丞相孫以

右文殿脩撰來就試直欲首送阜卿得予文卷擢

置第一秦氏大怒予明年既顯黜先生亦幾陷危

機偶秦公薨遂已予晚歲料理故書得先生手帖

追感平答作長句以識其事不知哀涕之集也

冀北當年浩莫分斯人一顧每空羣國家科第與風漢天
下英雄惟使君後進何人知大老橫流無地寄斯文自憐
衰鈍辜真賞猶竊虛名海內聞

東堂睡起

置身事外息吾黥獨卧空堂一榻橫簷影漸移知日轉樹
梢微動覺風生每從山寺開經帙間就園公辨藥名若論
胸中淡無事八珍何得望藜羹

五鼓起坐待旦

睡覺初聞鷄一鳴披衣危坐待窗明殘軀已向閑中老癡
夢猶尋熟處行南北迢迢悲往事古今莽莽歎浮生伯倫
一鋪君休笑冢象祁連亦已平

遣興

湖海元為汗漫游誤恩四領慢亭秋掃空薄祿始無媿閉
上衡門那得愁湯嫩雪濤翻茗椀火溫香縷上衣篝牀頭
亦有開書卷信手拈來倦即休

書齋壁

平生憂患苦縈菱刺磨成茨實園俗謂困折多者謂天
菱角磨作鷄頭
下不知誰竟是古來惟有醉差賢過堂未悟鐘將響曉柱
寧知壁偶全自笑為農行沒世尚知驚雁落空弦

無酒歎

不用塞黃河不用出周鼎但願酒滿家日夜醉不醒不用
冠如箕不用印如斗但願身強健朝暮常飲酒造物不少
恕虐戲逐段新坐令古銅榼經月常生塵平生得酒狂無
敵百幅淋漓風雨疾造物欲以醒困之此老醒狂君未知

舟中作

沙路時晴雨漁舟日往來村村皆畫本處處有詩材炊黍
孤煙晚呼牛一笛哀終身看不厭岸憤興悠哉

秋晚

木落寺樓出江平沙渚生牛羊下殘照鼓角動高城寒至
衣猶質憂多夢自驚羣方鬪穴河渭幾時清

西窗獨酌

却掃衡門歲月淡殘骸況復病交侵平生所學爲何事後
世有人知此心水落枯萍黏破塊霜高丹葉照橫林一樽
濁酒西窗下安得無功與共斟

種蔬

老翁老去尚何言除却翻書卽灌園處處移蔬藥小雨時
時拾礫繞頽垣江鄉地暖根常茂旱歲蟲生葉未繁四壁
愈空冬祭近更催糝子牧鷄豚

新治暖室

小堂穩暖紙窗明低幌圍爐亦已成日閱藏經忘歲月時
臨閣帖雜真行詩才退後愁酣戰酒量衰來喜細傾從此
過冬那復事夜溪時聽雪來聲

歲晚

無窮世事浩難量歲晚沉綿臥草堂短褐坼圖移曲折故
書經蠹失偏傍賣刀擬買春耕犢挾策曾忘舊牧羊點檢
生涯還自笑菜畦殘葉帶新霜

吳中冬蔬常茂

齋中弄筆偶書示子聿

左右琴樽靜不譁放翁新作老生涯焚香細讀斜川集候
火新烹顧渚茶書爲半酣差近古詩雖苦息未名家一窗
殘日呼愁起裊裊江城咽暮笳

新籬

新籬三面北通門
藤架陰中細路分
天雨淡青成卵色
水波微皺作靴紋
參差村舍穿林出
縹渺漁歌隔浦聞
忽覺楚鄉來眼底
欲題幽句弔湘君

村興

身老交情見孫生
口數添園丁上牛
米村婢博蚕鹽
糶杖堆盤白餠餽
出釜甜閉門君勿
諂衰病正相兼

小圃獨酌

少時裘馬競豪華
豈料今爲老圃家
數點霏微社公雨
兩麓閒淡女郎花
詩成枕上常難記
酒滿街頭却易賒
自笑邇來能用短
只將獨醉作生涯

春日

方池潋潋碧波平
曲徑纖纖細草生
席地幙天君但醉
苦無多日是清明

雪山萬疊看不厭
雪盡山青又一奇
今代江南無畫手
矮牋移入放翁詩

怕見公卿嬾入城
野橋孤店跨驢行
天公遣足看山願
白盡髭鬚却眼明

新晴野步

吹盡浮雲旋作晴
郊原高下水縱橫
煙蕪漫漫如漆色
谷鳥關關已變聲
迨酒賤時須痛飲
得人扶處儘閒行
隔湖遙指蘭亭路
鄰叟追隨羨眼明

夜行過一大姓家值其樂飲戲作

村豪聚飲自相歡
燈火歌呼鬧夜闌
醉飽要勝飢欲死
看渠也復面團團

貧甚賣常用酒杯作詩自戲

桃李成塵渾不數海棠也作胭脂雨清明未到春已空枝
上流鶯替人語逢春日日合醉歸莫笑典衣窮杜甫生時
不肖澆舌本死後空持醅墳土門前三百里湖光天與先
生作醉鄉銀杯羽化不須歎多錢使人生窟郎

東園小飲

乞得殘骸老故山草亭終日對孱顏孤雲百尺起江際幽
鳥數聲鳴竹間衆死一身今獨健人忙萬物本常閒此心
欲語知誰聽賴有漁樵日往還

龜堂晚興

九日春陰一日晴回塘閒院愜幽情小魚出水圓紋見輕
燕穿簾折勢成今日揜關真佚老向來涉世亦遺民巡簷

更有欣然處新筍初抽四五莖

齋中雜興十首以丈夫身壯健慘戚非朱顏爲韻

成童入鄉校諸老席函丈堂堂韓有功英槩今可想從父
有彥遠早以直自養始終臨川學力守非有黨紛紛名世
師有泚在其頽二公生氣存千載可畏仰

士生學六經是爲聖人徒處當師顏原出當致唐虞斯文
陣堂堂臨敵獨援枹異端滿天下一掃可使無乃知立事
功先要定規模彼雖力移山安能奪匹夫

公議在天下如人有元氣平居失護養一旦可勝諱神丹
卒難求百疾起如蝟奄奄息僅屬熟視吁可畏大義在春
秋遺跡悲漢魏君看徐孺子底物視富貴

咎我自蜀歸耆舊已凋喪後來二三公尚慰天下望千里

一紙書殷懃問亡恙嗚呼亦已矣遺語寄悲愴我亦迫桑榆便恐無輩行夜窗對青燈力憊心尚壯

餘齡垂八十雖憊猶強飯正如老病馬風沙時一噴玉關恥何許道理何啻萬目中埃歷歷欲進不能寸矯首望秋空徒羨霜鵲健葬骨亦何悲吾非麒麟植

琅琅誦詩書尚記兩髦髭誰料七十年沉滯終坎窞炊突映茅廬日暮煙慘慘忍窮端已熟撫爭空自感狂言悔噬臍衆驚破膽尚有愛書心還如嗜菖歎

去國已酉冬忽見十頒曆衰殘口兩齒困阨家四壁時看溪雲生飽聽簷雨滴悠然度寒暑何處著欣戚幽人豈知我月夕聞吹笛何當五百歲相與摩銅狄湖中風月佳時每聞笛聲甚

莫知何人意其隱君子也

扁舟東下映日月去若飛當時筆硯舊久已晨星稀俊逸

如伯渾簡語如知幾天高鬼神惡回首萬事非我欲沂黃

牛買屋居青衣九原不可作哀哉誰與歸

荷鉏艸堂東藝花二百株春風一朝來白白兼朱朱南列

紅薇屏北界綠芋區偃蹇雙松老森聳萬竹懼餘地不忍

莠插援引瓠壺何當拂東綉畫作山園圖

閒居寂無客柴門晝常關孤舟小於葉放浪煙水間樹暗

楊梅村露下白蓮灣釣魚樵風溼買酒石帆山向來支許

輩恐亦無此閒道逢若耶叟握手開蒼顏

觀畫山水

古北安西志未酬人間隨處送悠悠騎驢白帝城邊雨挂席黃陵廟外秋大網截江魚可膾高樓臨路酒如油老來

無復當年快聊對丹青作卧遊

讀蘇叔黨汝州北山雜詩次其韻

暑耘日炙背寒耕泥沒脚衆人占膏腴我獨治磽确力盡
功未見厥土但如昨豈惟空糠粃直恐轉溝壑今年雨暘
時天如相耕穫屋傾未暇且復補籬落
祠官粟一囊不贍軀七尺前年蒙寬恩例許乞骸骨聯翩
三兒子俱作鶴雀碧賦祿雖尚遠亦足慰衰白幅巾茆簷
下稱病謝來客從今門前路永掃車馬跡
德孫秀眉宇慨然修初服枯腸貯詩書寸飯丸不肉成童
將覓舉想見袍立鵠先澤儻未衰豈無五秉粟汝能記吾
言併以告阿福閉門勿雜交一經萬事足

蘇世堯上作

